

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ ОЛИЙ МАЖЛИС ВА ЎЗБЕКИСТОН ХАЛҚИГА МУРОЖААТНОМАСИ

Ассалому алайкум, азиз юртдошлар!

Хурматли депутат ва сенаторлар! Муҳтарам меҳмонлар!

Бугун Олий Мажлисга ва кўпмиллатли халқимизга келгуси йил учун Мурожаатномани тақдим этар эканман, аввало, барчангизни соғ-саломат, кўтаринки кайфиятда кўриб турганимдан хурсандман.

Сўнгги тўққиз йилда биз сизлар билан, эл-юртимиз билан биргаликда катта тараққиёт йўлини босиб ўтдик. Иқтисодиётимиз янгидан шаклланди, бозор муносабатларини, ижтимоий ҳимояни кенгайтирдик, қонун ўстуворлигини мустаҳкамладик. Энг муҳими, ислохотларимиз самарасини ҳар бир маҳалла, ҳар бир хонадон ва ҳар бир инсон кундалик ҳаётида ҳис қилмоқда.

Бир сўз билан айтганда, биз ислохотларни аниқ амалий натижага айлантиришни ўргандик. Бунинг тасдиғини тобора янгича қиёфа касб этиб бораётган шаҳар ва қишлоқларимизда, замонавий корхоналар, савдо-сервис масканлари, мактаб, боғча ва шифохоналар, обод кўча ва маҳаллалар, транспорт-логистика тизими, рақамли хизматлар мисолида яққол кўриш мумкин.

Қадрли ватандошлар!

Бугунги кунда дунёда содир бўлаётган ва яқин-яқингача ҳеч ким тасаввур қила олмаган ўзгаришлар, давлатлар ўртасида иқтисодий қарама-қаршилиқ, ҳавфсизликка таҳдидлар ортиб бораётган таҳликали бир вазиятда сизлар билан ўта мураккаб йилни яқунлашмиз.

Қанчалик оғир бўлмасин, бошлаган демократик ислохотларимизни қатъий давом эттирганимиз; халқимизнинг қўллаб-қувватлаши ва ёшларимизнинг ғайрат-шижоати; ҳамжиҳатлик асоси бўлган маҳалланинг ҳаётимиздаги ўрни ва таъсирини кучайтирганимиз; одамларимизнинг онги ва дунёқарашини ўзгартириб, эл-юртимизни янада жипслаштирганимиз; тadbиркор,



деҳқон ва фермерларимизнинг ташаббускорлиги ва мардона меҳнати; ўзаро манфаатли ҳамкорликка асосланган дўстона ташки сиёсатимиз ҳисобига 2025 йилда барча соҳаларда улкан ютуқларга эришдик.

Аввало, жаҳон миқёсида ишлаб чиқариш ва транспорт-логистика занжирлари ўзилган, хомашё ва молиявий ресурслар нархи ошган шароитда ҳам мамлакатимиз иқтисодиёти ишончли ва барқарор ўсишда давом этаётганини қайд этиш лозим.

Бу натижалар дунё ҳамжамияти ва нуфузли халқаро ташкилотлар томонидан эътироф этилмоқда.

Этибор беринг, бундан тўққиз йил олдин иқтисодиётимиз ҳажмини 100 миллиард долларга етказиш биз учун жуда катта марра бўлиб кўринарди. Бу йил тарихимизда биринчи марта ялпи ички маҳсулотимиз 145 миллиард доллардан ошди. Бундай юксак натижалар халқимизнинг, барчамизнинг қандай улкан ишларга

қодир эканимизни яққол намоён этмоқда.

Глобал савдо тизимида “ўйин қоидалари” ўзгараётган бир пайтда биз бу йил экспортимизни 23 фоизга ошириб, 33,4 миллиард долларга етказамиз. Энг муҳими, ислохотларимиз учун мустаҳкам молиявий база бўладиган олтин-валюта захираларимиз илк бор 60 миллиард доллардан ошди.

Бу йил иқтисодиётимизга жалб қилинган хорижий инвестициялар ҳажми 43,1 миллиард долларга етди. Жами инвестицияларнинг ялпи ички маҳсулотдаги улуши 31,9 фоизни ташкил этмоқда. Бу эса иқтисодиётимиз келгуси йилларда ҳам юқори суръатлар билан барқарор ўсиб бориши учун замин бўлади.

Ўзбекистоннинг халқаро майдондаги обрў-эътибори ва нуфузи, халқаро рейтинглардаги ўрни тобора мустаҳкамланиб бормоқда. Хусусан, етакчи халқаро рейтинг агентликлари мамлакатимизнинг суверен

рейтингини “BB -”дан “BB” поғонасига кўтарди.

Бу гаплар кўпчиликка оддий бир факт бўлиб туюлиши мумкин. Лекин, иқтисодчилар, инвестор ва банкирлар гап нақадар катта натижалар ҳақида бораётганини жуда яхши тушуниб турибди. Биргина ана шу ўзгариш туфайли четдан жалб қилинадиган ресурсларнинг фоиз ставкаси 1-1,5 пунктга пасайиб, ташқи қарз харажати йилига камида 300 миллион долларга камайд.

Шунингдек, Жаҳон банки эълон қилиб борадиган Давлатларнинг технологик етуқлик индексида Ўзбекистон 71 поғона юқори кўтарилиб, дунёнинг топ-10 та мамлакат қаторидан жой олди.

Аҳоли фаровонлиги ва бизнесни ўстиришга хизмат қиладиган инфратузилмани янада яхшилаш бўйича ҳам 2025 йил катта ўзгаришлар йили бўлди. Хусусан, энергетика соҳасида түб бурилиш ясаганимиз ҳисобига электр ишлаб чиқариш ҳажмини 85 миллиард

киловатт-соатга етказдик.

Тасаввур қилинг, 2017 йилдаги 60 миллиард киловатт-соат генерация даражасида қолиб кетганимизда, ҳозир иқтисодиётимиз ҳажмини 2 карра ошира олармидик? Ишлаб чиқаришнинг ўсиб бораётган талабини, 38 миллион аҳоли эҳтиёжини қоплаб бўлармиди?

Бу йил 188 та маҳалладаги 715 минг аҳоли яшайдиган хонадонларга биринчи марта тоза ичимлик суви кириб борди, яна 2 миллион 300 мингга яқин аҳолининг сув таъминоти яхшиланди. Ёки 867 та “оғир” маҳалладаги 470 мингта хонадонга томорқаларни суғориш учун илк бор сув етиб борди.

Жорий йилда аҳолига 8 миллион 100 минг квадрат метрли, 135 минг хонадондан иборат кўп қаватли уйлар топширилмоқда, одамларнинг ўзи ҳам яшаш шароитини яхшилаш учун 19 миллион квадрат метр майдонда қурилиш қилди. Бизнес вакиллари томонидан 24 миллион квадрат метр нотура-р-жой объектлари барпо этилди.

Умуман, сўнгги тўққиз йилда 210 миллион квадрат метрли турар-жой ва нотура-р-жой объектлари фойдаланишга топширилди.

Бу рақамларга урғу бериб айтаятганим албатта беҳиз эмас. Агар йўл, сув, электр ва бошқа инфратузилмалар учун зарур маблағни топиб бермаганимизда, қурувчилар ва қурилиш материаллари корхоналари учун шароит яратиб бермаганимизда, ипотека тизимини йўлга қўймаганимизда, шунча бунёдкорлик ишлари бўлармиди?

Жорий йилда 5 миллион аҳолиимиз даромадли бўлиб, ишсизлик даражаси 5,5 фоиздан 4,9 фоизга тушди. Қарийб 1,5 миллион эҳтиёжманд аҳоли камбағалликдан чиқди, илк бор 1 минг 435 та маҳалла “камбағалликдан холи” ҳудудга айланди.

► (Давоми 2,3,4,5-бетларда)

УМИД, ҚУВОНЧ ВА ЯНГИ ОРЗУЛАР БАЙРАМИ

Солномамизда байрамлар кўп, ҳар биримиз учун алоҳида ҳаётий аҳамият касб этадиган саналар ҳам. Аммо Янги йил шундай байрамки, бу кунда гўё кўз очиб-юмгулик фурсат ичида поёнига етган йилнинг сарҳисобини қиламиз. Бир-бирини қувлаб ўтган кунлар, ҳафталар, ойлар давомида топганларимизни ва йўқотганларимизни ёдга оламиз. Янги йил кириб келаётганини дарақлаган кўнғироқлар умримизнинг яна бир саҳифаси очилаётгани ҳақида қалбимизда акс-садо беради. Янги йилни янги орзулар билан қарши оламиз.

Бу байрамни, айниқса, болажонлар интиқиб кутадилар. Байрам арчасига илинган ранго-ранг, жилваланиб турган ўйинчоқлар, Қорбобо, Қорқиз ва эртақ қаҳрамонларининг ташрифлари, ширилиқка тўла байрам совғалари, қувноқ кўшиқ-рақслар уларни шунчалар шодлантирадики, бундан беихтиёр биз, катталар ҳам болага айланиб қоламиз. Туйқус болалик маъсумиятини юрак-юракдан ҳис этамиз.

Юртимизда Янги йил байрами шукуҳи деярли ҳар бир хонадонга кириб боради. Байрамонда дастурхон атрофида оиланинг бир неча авлод вакиллари жам бўлади, хурсандчилик қилинади. Байрам баҳона яқин инсонларини йўқлайдилар, ҳамма бир-бирига эзгу тилак билдирадилар. Қўмакка муҳтож қатлам ҳолидан хабар олиниб, совға-саломлар улашилади. Саховат, мурувват тadbирлари бир-бирига улашиб кетади. Зотан, тинчлик, осойишталик бор экан, юртга мана шундай байрамлар ярашади.

Холисона айтганда, 2025 йил мамлакатимиз учун хайру баракали келгани рост. Бу Президентимизнинг Олий Мажлис ва кўп миллатли Ўзбекистон халқига Мурожаатномасида ҳам чуқур



таҳлилий баён этилди.

Муҳими, ҳар бир инсоннинг бахтли ва муносиб яшашини таъминлаш, жамиятда ижтимоий тенглик ва адолат тамойилларини қарор топтиришга қаратилган кенг қамровли ислохотлар тафтини, самарасини юртдошларимиз ўз ҳаётлари мисолида кўрмоқдалар. Янги йилга кўнғил хотиржамлиги, эртанги кунга ишонч ва шукроналик билан пешвоз чиқмоқдалар.

- Ҳар йили набирамни мана шу – Алишер Навоий номидаги кутубхона қаршисидаги



майдонда ўрнатилган Янги йилнинг бош арчаси очишлишига олиб келаман, - дейди тошкентлик Зоҳида ая Мирзаева. - Байрам шодиёналарини биз шу ердан бошлаймиз, десак ҳам бўлади. Концерт дастурлари, эртақ қаҳрамонлари иштирокидаги томошалар, атрофдаги гўзаллик, турли аттракционлар, одамларнинг очик чехраси, болаларнинг кулгиси – бари-бари кишига бошқача завқ беради. Набирамнинг қувонишини кўриб, чарчаганимни ҳам билмайман... Мана шундай кунлар учун ич-ичимдан миннатдорлик туйғусини туяман.

Янги йил ҳам эл-улусимизга, юртимизга қутлуг келсин.

Эслатиб ўтаман, юртдошларимизга байрам кайфиятини улашиш мақсадида пойтахтдан ташқари Қорақалпоғистон Республикаси ва вилоятлар марказларида ҳам Янги йил бош арчалари ўрнатилган. Ушбу майдонларда юқори даражада ташкил қилинган байрам тadbирлари давом этмоқда.

Фарида МАҲКАМОВА,
“Ўзбекистон овози” муҳбири.

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ ОЛИЙ МАЖЛИС ВА ЎЗБЕКИСТОН ХАЛҚИГА МУРОЖААТНОМАСИ

► (Давоми. Боши 1-бетда)

Камбағал оилаларга мансуб 168 минг нафар бола давлат боғчаларига имтиёзли асосда қабул қилинди. Бу йилдан бошлаб, 208 та боғчада биринчи марта инклюзив таълим тизимини жорий этдик.

Таъкидлаш керакки, юртимизда камбағаллик даражаси йил бошидаги 8,9 фоиздан 5,8 фоизга тушди.

Бир эсланг, бу ишларни бошлаганимизда аҳолимизнинг учдан бир қисми камбағаллик чегарасида яшарди. Кредит, субсидия, компенсация каби 100 дан зиёд хизматлар орқали ижтимоий ҳимоянинг мутлақо янги тизимини йўлга қўйганимиз ва буларни маҳалладаги "еттилик"нинг ўзига берганимиз натижасида 8,5 миллиондан зиёд одам камбағалликдан чиқди, ишсизлик 2 карра қисқарди. Натижада уч йил олдин камбағаллиқни 2026 йил якуни билан 2 карра қисқартириш бўйича олган маррамизни шу йилнинг ўзида уддаладик.

Энг муҳим ютуқларимиз ҳақида сўз юритганда, азму шижоатли спортчиларимизнинг нуфузли халқаро мусобақаларда эришган ғалабаларини мамнуният билан таъкидлаш ўринлидир.

Аввало, Ўзбекистон футболга учун 2025 йил чинакам тарихий йил бўлди. Миллий терма жамоамиз илк бор Жаҳон чемпионатида йўлланмани қўлга киритди. Моҳир шахматчиларимиз Жаҳон кубоги мусобақаларида муносиб иштирок этди. Айниқса, навқирон гроссмейстеримиз Жавохир Синдоров энг ёш жаҳон кубоги соҳиби бўлгани барчамизга юксак ғурур бағишлайди.

Энг муҳими, шахмат оламидаги ютуқларимиз шу билан тўхтаб қолгани йўқ. Ўтган ҳафтада 9–17 ёшли шахматчилар ўртасида "рапид" ва "блиц" йўналишлари бўйича жаҳон чемпионатида юртимиз вакиллари 5 та олтин, 2 та кумуш ва 5 та бронза медалини қўлга киритиб, умумжамоа ҳисобида биринчи ўринни эгаллади.

Бу йилги Ёшлар Параолимпий ўйинларида жасорат ва матонат соҳиби бўлган спортчиларимиз 125 та олтин, 77 та кумуш ва 52 та бронза медалини қўлга киритиб, иштирокчи давлатлар орасида энг юқори натижани қайд этди.

Ҳеч шубҳасиз, истеъдодли ўғил-қизларимиз таълим, илм-фан, маданият, санъат, спорт ва бошқа соҳаларда эришаётган катта ютуқлари билан ҳам Янги Ўзбекистониимиз равнақига муносиб ҳисса қўшмоқда.

Ўқувчи ва талабаларимиз жорий йилда халқаро фан олимпиадаларида 51 та олтин, 101 та кумуш, 126 та бронза медалини қўлга киритиб, ўз билим ва салоҳиятини бутун дунёга намойиш қилди.

Эл-юртимизнинг фахри бўлган бундай фарзандларимизга, уларнинг ота-оналари ва устоз-мураббийларига яна бир бор чин дилдан таҳсин айтамиз.

Маълумки, Ўзбекистон келгуси йили 46-Бутунжаҳон шахмат олимпиадасига, 2027 йилда 20 ёшгача бўлган футболчилар ўртасидаги жаҳон чемпионатида, 2029 йилда эса Ёшлар Осиё ўйинларига мезбонлик қилади.

Шу билан бирга, 2026 йилда юртимизда илк бор мактаб ўқувчилари ўртасида нуфузли халқаро кимё ва информатика олимпиадалари, Шанхай ҳамкорлик ташкилотига аъзо давлатлар талабалари ўртасида муҳандислик йўналишларида, Туркий давлатлар техникумлари ўқувчилари ўртасида касб йўналишларида халқаро олимпиадалар ўтказилади. Ушбу мусобақаларда ҳам фарзандларимиз муносиб иштирок этади, деб ишонаман.

Бундай нуфузли тадбирлар Ватанимизни ривожланган спорт ва илм-фан мамлакатига айлантириш, унинг обрў-эътиборини юксалтиришга хизмат қилади.

Кейинги пайтда юртимиз глобал масалалар муҳокама қилинадиган халқаро мулоқот майдонига айланиб бормоқда. Хусусан, бу йил Парламентларо Иттифокнинг 150-юбилей Ассамблеяси; ЮНЕСКО Бош конференциясининг сессияси; "Марказий Осиё – Европа Иттифоқи" саммити ва халқаро Иқлим форумига мезбонлик қилдик.

Шунингдек, Ўзбекистон, Тожикистон ва Қирғизистон етакчиларининг март ойида Хўжанда бўлиб ўтган учрашувида биринчи марта уч мамлакат давлат чегараларининг туташ нуқтаси тўғрисидаги тарихий шартнома имзоланди ҳамда "Абадий дўстлик тўғрисида"ги декларация қабул қилинди.

Минтақамиз давлат раҳбарларининг яқинда Тошкентдаги Маслаҳат учрашуви чоғида биз интеграция жараёнларини янги сифат босқичига кўтариш учун Марказий Осиё ҳамжамияти стратегик форматини ташкил қилиш ғоясини илгари сурдик. Озарбайжонни Марказий Осиё ҳамжамияти форматига тўла ҳуқуқли аъзо сифатида қабул қилиш тўғрисидаги қарор тарихий аҳамиятга эга бўлди. Ушбу қадам Марказий Осиё ва Жанубий Кавказ ўртасида стратегик боғлиқлик ва барқарорликни кучайтириши шубҳасиз.

Шу билан бирга, октябрь ойида Брюсселда Ўзбекистон ва Европа Иттифоқи ўртасида Кенгайтирилган шериклик ва ҳамкорлик тўғрисидаги битим имзоланди. Ноябрь ойида бўлиб ўтган Марказий Осиё ва АҚШ саммити кўп томонлама ва узоқ муддатли шерикликни сифат жиҳатидан мутлақо янги босқичга олиб чиқишга хизмат қилди.

Ўтган ҳафтада Токиода Марказий Осиё ва Япония етакчиларининг учрашувида таълим, тиббиёт, рақамли технологиялар, инфратузилма ва саноат соҳалари бўйича муҳим келишувларга эришдик. Шу ҳафтанинг



бошида эса Санкт-Петербургда Мустақил Давлатлар Ҳамдўстлиги раҳбарлари билан бўлиб ўтган учрашув ҳам ҳамкорлигимизнинг долзарб йўналишларини белгилаб берди.

Буларнинг барчаси халқаро алоқаларимизни мазмун жиҳатидан янги босқичга олиб чиқмоқда.

Биз дунёдаги узоқ-яқин мамлакатлар билан – Шарқ ва Ғарб, Шимол ва Жануб билан ҳамкорлик кўприқларини қуришда давом этамиз.

Мухтарам йиғилиш иштирокчилари! Бундан икки йил олдин "Ўзбекистон – 2030" стратегиясини қабул қилганимизда ялпи ички маҳсулот ҳажминин 2030 йилгача 160 миллиард долларга етказишни белгилаб олган эдик. Кўриб турибсизлар, мавжуд салоҳиятимиз, бүгунги ислохотларимиз, тадбиркорларимизнинг фаоллиги, хорижий шерикларимиз билан ҳамкорлигимиз ўсиб бораётгани ҳисобига бу маррага 2026 йилнинг ўзида бемалол эриша оламиз.

Ҳозирги глобал иқтисодийтада рақобатга чидамли бўлиш учун малакали касб эгалари ва мутахассислар, замонавий технологиялар ҳал қилувчи аҳамиятга эга эканини унутмаслик лозим. Агар биз саноатда – электроника ва электротехника, биокимё ва полимерлар, фармацевтика, машинасозлик каби юқори қўшилган қиймат яратадиган соҳаларни ривожлантириш; хизматларда – IT, сунъий интеллект, финтех, консалтинг, транспорт-логистика каби катта даромад келтирадиган сервисларни кўпайтириш; қишлоқ хўжалигида – унумдорликни ошириш учун биоинженериядан кенг фойдаланиш, илғор агротехника ва сув тежайдиган усулларни фол қўллаш; иқтисодий ўсиш ва экологик барқарорлик ўртасидаги мувозанатни таъминлаш учун "яшил" энергетика, чиқиндиларни ишлаб чиқаришга ўтиш; таълим ва тиббиётда – сифатни янги босқичга олиб чиқадиغان илғор хорижий тажрибаларни кенг жорий этиш учун янги технологияларни олиб кирсак, кадрларни илм-фан ва инновацияларга асосланган замонавий касбларга тайёрласак, келгуси беш йилда иқтисодийтимиз ҳажминин 240 миллиард доллардан оширишга барча имкониятларимиз бор.

Бу рақамлар аниқ ва пухта ҳисоб-китобларга асосланган прогноз. Халқаро валюта жамғармаси ва нуфузли экспертларнинг хулосалари ҳам буни тасдиқламоқда.

Ҳурматли юртдошлар! Биз – бугун 38 миллиондан зиёд катта халқмиз. Машаққатли ва шарафли меҳнатимиз билан дунёда ҳурмат топаётган, эртанги кунга ишонч билан дадил бораётган, матонатли ва ғурури билан миллатмиз.

Биз ўзгаришларни кутиб яшамаймиз, аксинча, уларни ўзимиз, ўз ақл-заковатимиз ва масъулиятли меҳнатимиз билан яратамиз.

Ҳар йили аҳолимиз ўртача 2 фоизга ўсмоқда, 1 миллиондан зиёд ўғил-қизларимиз катта ҳаётга кириб келмоқда. Ёшларимизга қараб, улар эришаётган ютуқларни кўриб, кўксимиз тоғдек қўтарилади, қандай улкан жамоасининг бир қисми деб ҳисоблаши ҳам шундан далолат беради.

Албатта, бугунги мураккаб замонда ёшларимизни турли сновларга чидамли, ватанпарвар инсонлар этиб тарбиялаш, халқимизни янада бирлаштириш ва жишлаштиришда, ҳеч шубҳасиз, ўзини ўзи бошқаришнинг ноёб тизими бўлган маҳаллаларнинг ўрни ва аҳамияти катта.

Маҳалла ва яхши қўшничилик ўзаро уйғун кадриятлардир. Улар жамиятда инсоний ва ижтимоий капитални янада бойитишга бекиёс ҳисса қўшади. Мамлакатимизда ўтказилган ижтимоий сўровларда иштирок этганларнинг 90 фоиздан кўпроғи ўзини маҳалла жамоасининг бир қисми деб ҳисоблаши ҳам шундан далолат беради.

Барчамиз учун ҳам ота, ҳам она бўлган маҳаллага, шу асосда Ватан тақдирига дахлдорлик туйғусининг юқорилиги ушбу институт, аввало, ижтимоий бирдамлик манбаи эканини кўрсатади.

Албатта, биз учун ҳозирги глобал тараққиёт даврида, дунёда ўта кескин ва таҳликали жараёнлар юз бераётган бугунги кунда миллий бирлик ниҳоятда муҳим ва зарур.

Донишманд боболаримизнинг "Бирлашган – ўзар, бирлашмаган – тўзар", деган ҳикматли мақоли бор.

Чиндан ҳам, қаранг, кимки бирлашди – ҳаётда ўзди, ғалабага эришди. Кимки бирлашмади – тўзиб, йўқ бўлиб кетди.

Тарих давомида қандай оғир синовларга дуч келмаймиш, биз, аввало, бирдамликдан куч олдик. Машаққатли кунларда

одамларимиз, маҳалла аҳли елкадош бўлиб қийинчиликларни енгган. Оила – оилага, қўшни – қўшнига қўмак бериб яшаган. Биз мана шундай ўта ноёб қадриятимизга доимо содиқ қолишимиз, ёш авлодимизни айни шу руҳда тарбиялашимиз керак.

Бутунги кунда жамиятимизда турли хил фикр ва қарашлар бўлиши табиий. Бу – демократиянинг бирламчи талаби. Аммо, миллати, тили ва динидан қатъи назар, бутун эл-юртимизни бирлаштирадиган улуг бир ғоя бор. У ҳам бўлса, Ватан манфаати, халқимиз манфаатидир.

Мана шундай буюк мақсадга эришишда маҳалла тизимининг ўрни ва таъсири бекиёс. Чунки маҳалла тинч ва аҳил бўлса, жамиятимиз тинч ва ҳамжихат бўлади. Маҳалла ривожланса, бутун мамлакатимиз юксалади.

Шуларнинг барчасини ҳисобга олиб, 2026 йилни юртимизда **"Маҳаллани ривожлантириш ва жамиятни юксалтириш йили"**, деб эълон қилишни тақлиф этаман.

Қўллаб-қувватлаганингиз учун раҳмат. Янги йилнинг номида белгиланган устувор вазифаларни амалга ошириш учун алоҳида давлат дастурини қабул қиламиз. Ушбу дастурда юртимиздаги 9 мингдан зиёд маҳаллани, аввало, меҳр-оқибат, ҳамжихатлик, адолат ва тарбия масканига айлантириш каби долзарб масалалар ўз ифодасини албатта топади. Бу ҳақда мен кейинроқ батафсил тўхталиб ўтаман.

Олдимизга қўйган мақсадларни факат ўзимиз – катта ҳаётий тажрибига эга маҳалла раислари ва фаоллари, ҳурматли нуронийларимиз, опа-сингилларимиз, серғайрат ёшларимиз, зиялиларимиз, ишбилармон тадбиркорларимиз, Ватан посбонлари, бир сўз билан айтганда, бутун халқимиз билан биргаликда амалга оширамыз. Ҳурматли депутат ва сенаторлар!

Биз Янги Ўзбекистонни барпо этишда ҳал қилувчи босқичга қадам қўймоқдамиз. Бу йўлдаги ишларимиз ҳар бир соҳа ва тармоқда чуқур трансформацияни талаб қилади. Мақсадимиз аниқ: яқин йилларда даромади жон бошига ўртадан юқори бўлган мамлакатлар қаторига кириш.

Фарғона водийсидан Оролбўйигача, Зарафшон воҳасидан Қашқадарё ва Сурхондарёгача, Тошкентдан тортиб Жиззах ва Сирдарёгача – юртимизнинг қайси ҳудудига яшамасин, ҳар бир фуқаромиз ислохотлар натижасини кундалик ҳаётида янада кўпроқ ҳис қилиши керак. Шунинг учун, кириб келаётган 2026 йил давлат бошқаруви, суд-ҳуқуқ тизими, иқтисодий тармоқлари, таълим, илм-фан, тиббиёт, маданият, спорт, экология тизимини – барча-барча соҳаларни ривожлантиришда туб бурилиш йили бўлади.

Энди Мурожаатноманинг асосий қисми – 2026 йилда амалга ошириладиган энг муҳим 6 та устувор йўналишдан иборат дастур ҳақида атрофлича тўхталиб ўтамыз.

Биринчи устувор йўналиш – маҳалла инфратузилмасини янада яхшилаш, уларга Янги Ўзбекистон қиёфасини олиб киришдан иборат.

Юрт ободлиги, аввало, маҳалладан бошланади. Айнан маҳалладаги йўл, сув, электр ва транспорт таъминоти, боғча, мактаб ва оилавий поликлиникадаги шарт-шароитларга қараб, одамлар ислохотларимизга баҳо беради. Шу боис маҳалла тизимини ривожлантириш давлат сиёсатининг устувор йўналиши бўлиб келган ва шундай бўлиб қолади.

Маҳалла инфратузилмасини тубдан яхшилаш орқали биз мамлакатимизни ҳар томонлама ривожлантириш, унинг қиёфасини янада гўзал ва обод қилиш борасидаги ишларни давом эттирамыз.

Ҳозирги вақтда қайсидир маҳаллада йўл, қайси бирида сув ёки электр масаласи, бошқасида боғча, мактаб, тиббиёт, яна бирида уй-жой билан боғлиқ масалаларга алоҳида-алоҳида ечим берилмоқда. Очик айтиш керак, бунинг ўзи билан маҳалладаги барча масалалар тўлиқ ҳал бўлиб қолмайди. Шунинг учун келгуси йилда маҳаллани ривожлантириш бўйича комплекс ёндашув жорий этилади.

Ҳар бир вилоятда 2-3 тадан туманни танлаб, улардаги ҳамма маҳаллада барча муаммоларни бир вақтнинг ўзида ҳал қиладиган тизим яратамиз. Бу янги тажрибани Ургут туманидан бошладик. Туманда 100 минг аҳолига мўлжалланган замонавий экошаҳар барпо этилади. Келгуси йил 544 миллиард сўм ажратилиб, 72 та боғча, мактаб, поликлиника, шунингдек, ички йўллар қурилади ва таъмирланади, каналлар бетон билан қопланади, 2 та сел-сув омбори барпо этилади.

Танлаб олинган 33 та туман ва 330 та шароити оғир маҳалладаги ишлар ҳам шундай ташкил қилинади. Уларда бир вақтнинг ўзида тадбиркорлик инфратузилмаси ҳам ривожлантирилади. Ушбу мақсадда ҳар учун барча манбалар ҳисобидан 8,5 триллион сўм маблағ ажратилади.

Депутатларга ўз округидаги муаммоларни ҳал этиш учун 500 миллиард сўм, ҳар бир депутатга 3,3 миллиард сўмдан беряпмиз. Бу борада "яшил ҳудуд", "яшил боғ" яратиш бўйича ҳар бир депутатнинг ташаббусига қўшимча 330 миллион сўмдан йўналтирамиз. Бундай ёндашув орқали 2030 йилгача барча туманлардаги маҳаллаларга Янги Ўзбекистон қиёфасини олиб кирамиз.

Албатта, бу ишларни самарали ташкил қилиш учун туман бюджетни даромадларини камида 2 карра кўпайтиришга шароит яратиб бериш зарур. Шу мақсадда, 2026 йил 1 январдан бошлаб, қўшилган қиймат солиғидан тушумнинг Тошкент шаҳрида 5 фоизи, қолган ҳудудларда 20 фоизи қолдирилиб, бу маблағнинг ярми туманлар бюджетига ўтказилади.

Бундан ташқари, даромадларнинг прогнозга нисбатан ошириб бажарилган қисмининг 50 фоизи, экин ерларини ижарага бериш ва бозорлардан тушумлар ҳам тўлиқ туман бюджетига берилади.

Вилоят, туман ҳокимларига самарасиз ва бир-бирини тақорлайдиган штат бирликларни қисқартириб, тежалган маблағни аҳоли ўртага қўйган масалаларни ҳал қилиш учун ажратишга рухсат этилади. Бу орқали туманлар бюджетида йилгига 5 триллион сўмлик қўшимча манба шаклланади ва у маҳаллалар инфратузилмасини яхшилашга сарфланади.

Келгуси йилда илк бор маҳалла инфратузилмасини ривожлантириш учун 20 триллион сўмини вилоятларнинг ўзига беряпмиз. Энг муҳими, бу маблағларнинг ҳар бир сўми аҳолини учун қўшилган қиймат яратиши зарур. Шу боис бу пуллар умуман қайсидир туман учун эмас, балки маҳаллада иш ўринлари яратадиган, аҳолини даромадли қиладиган аниқ лойиҳаларга йўналтирилади.

Марҳамат, қайси маҳалла раиси, ҳоким ёрдамчиси ва маҳалла банкири лойиҳа қилиб, уни асослаб берса, зарур маблағни олсин. Шунда адолатдан бўлади.

Бу – бюджет маблағларини самарали ишлатишда лойиҳавий ёндашув бўлади.

Урбанизация ва шаҳарларни барқарор ривожлантириш бўйича янги ислохотларни бошлаймиз. Жумладан, шаҳарлар тартибсиз кенгайишининг олдини олиш бўйича аниқ мезонларни белгилаймиз ва шу орқали экин майдонлари асоссиз қисқариб кетишига чек қўйилади.

Масалан, аҳолиси 250 минг кишидан зиёд шаҳарлар ҳозиргидек тартибсиз кенгайиб кетаверса, 2030 йилда бориб 27 минг гектар экин майдонлари бой берилади. Албатта, бунга йўл қўйиш мумкин эмас.

Шунингдек, республикаимизда илк бор 45 та агломерация ҳудудини белгилаймиз. Келгуси йилда "Барқарор шаҳар" платформасини ишга тушириб, "яшаш учун қулайлик индекси"ни юритиш йўлга қўйилади. Бу индекс орқали шаҳарлардаги ҳар бир маҳаллага хос муаммолар аниқланиб, уларга мос ечимлар берилади.

Биз камбағалликни қисқартириш масаласини умуммиллий ҳаракатга айлантирдик. Такрор айтаман, ўтган даврда 8,5 миллиондан зиёд аҳолини камбағалликдан чиқаришга эришдик.

Асосий мақсадимиз – одамларимизни доимий даромадли қилишдан иборат. Пули бор одам яқини қийинши ва овқатланишга, сифатли таълим ва малакали тиббий хизматдан фойдаланишга, мазмунли дам олишга, бир сўз билан айтганда, фаровон яшашга интилади.

Муҳими, бу жараёнда тадбиркорларимиз ҳал қилувчи куч сифатида энг олдинги сафда туриб, саноат ва сервис объектларини ташкил қилиб, доимий иш ўрни яратишда, аҳолиимиз, айниқса, ёшлар ва хотин-қизларни касбга ўргатиб, маҳаллаларнинг ўзида ишли ва даромадли қилишда алоҳида жонбозлик кўрсатмоқда. Шунинг учун тадбиркорликни қўллаб-қувватлаш бўйича сиёсатимизни давом эттириб, 2026 йилда асосий солиқ ставкаларини ўзгаришсиз қолдирамиз; тадбиркорлик инфратузилмаси лойиҳаларига 10 триллион сўмдан зиёд маблағ ажратилади; кичик ва ўрта бизнесни ривожлантириш учун 140 триллион сўм ресурс берилади. Шундан 43 триллион сўми хотин-қизлар ва ёшлар тадбиркорлигини қўллаб-қувватлашга йўналтирилади.

Бундан ташқари, 2026 йилда "маҳаллада саноат ва хизмат" лойиҳаси орқали 10 мингдан зиёд ишлаб чиқариш ва хизмат кўрсатиш лойиҳаларини ишга тушириш учун 5 триллион сўм кредит берилади. Кредит фоизининг миллий валютада 10 фоизгача, хорижий валютада 4 фоизгача бўлган қисми Тадбиркорлик компаниясидан қоплаб берилади. Бунинг учун ҳам бюджетдан 400 миллиард сўм йўналтирилади. Натижада маҳаллаларда 100 мингта янги иш ўрни яратилади.

Ҳар бир маҳаллада 40 тадан микролойиҳани амалга ошириб, 360 минг аҳолини ишли қилиш учун маҳалла банкirlари ва ҳоким ёрдамчиларига 2026 йилда яна 7,5 триллион сўм ресурс ажратилади.

► (Давоми 3-бетда)

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ ОЛИЙ МАЖЛИС ВА ЎЗБЕКИСТОН ХАЛҚИГА МУРОЖААТНОМАСИ

► (Давоми. Боши 1,2-бетларда)

Янги йилда маҳаллалардаги аҳолини, хусусан, хотин-қизларни спортга кенг жалб этиш, бунинг учун зарур инфратузилмани яратиш бўйича уч йиллик дастур қабул қилиб, бунга 1 триллион сўм йўналтирамиз. Маҳалла ёшларининг китобхонликка бўлган қизиқишини янада ошириш мақсадида мактаб кутубхоналарини ҳар йили 10 миллион дона бадиий адабиётлар билан таъминлаб борамиз.

Ана шундай ишларимиз туфайли 2026 йилда 1 миллион одамни доимий иш билан таъминлаб, 181 минг оилани камбағалликдан чиқарамиз, камбағаллик ва ишсизлик даражасини 4,5 фоизга туширамиз, камбағалликдан холи маҳаллалар сонини 3,5 мингга етказамиз.

Қадрли ватандошлар!
Иккинчи устувор йўналишимиз – иқтисодиётни технологик ва инновацион ўсиш моделига ўтказишдан иборат.

Жаҳон миқёсида рақобат тобора кучайиб бораётган ҳозирги шароитда фақат юқори қўшилган қийматли маҳсулот ишлаб чиқарадиган давлатларгина дунё бозорига ўз ўрнига эга бўлмоқда. Шунинг учун иқтисодиётнинг барча соҳаларида юқори самарадорликка эришиш – келгусида ислохотларимизнинг бош мезони бўлиши шарт.

Масалан, саноатда юқори технологик ва кам энергия истеъмол қиладиган тармоқларни ривожлантирганимиз ҳисобига жорий йилда 1 доллар маҳсулот учун сарфланадиган ёқилғи-энергия миқдорини 13 фоизга камайтиришга эришдик. Биргина шунинг ўзи яна 1 миллиард долларлик қўшилган қиймат яратиш имконини берди.

Бу мисол шуни кўрсатадики, қаерда янги технология ва юқори малакали касб эгалари бўлса, ўша тармоқда ўсиш, ривожланиш бўлмоқда.

Шу боис 2030 йилга қадар ялпи ички маҳсулот ҳажмини 240 миллиард доллардан ошириш учун энг тўғри йўл – барча соҳаларни технологик ва инновацион ўсиш моделига ўтказишдир. Бу – келгуси йилларда иқтисодий тараққиёт стратегиямизнинг асосий йўналиши бўлади.

Юртимиздаги қулай бизнес муҳити, демографик ўсиш, инсон капиталига берилаётган эътибор – Ўзбекистонни инвесторлар учун энг жозибадор мамлакатлардан бирига айлантирмоқда. Масалан, биз тўққиз йилда барча иқтисодиёт тармоқларига 130 миллиард долларлик хорижий инвестиция олиб келдик. Жорий йилнинг ўзида чет эллик ҳамкорларимиз билан яна 140 миллиард долларлик янги инвестициявий келишувларга эришдик.

Келгуси йилда 50 миллиард доллар хорижий инвестиция жалб қиламиз. Бундан буён ҳар бир доллар инвестиция, энг аввало, илгор технологиялар ва уларнинг трансфери; ташқи бозори аниқ, юқори қўшилган қийматли маҳсулотлар ишлаб чиқаришга; энергия, сув, ер ва бошқа табиий ресурслардан фойдаланишда самарадорликни оширишга; маҳаллий ишчиларни янги технологиялар билан ишлашга ўқитиш ва меҳнат унумдорлигини оширишга хизмат қилиши керак. Яъни, юқори технология ва янги компетенциялар олиб кирган, экспорт учун ишлаган инвестор энг ишончли ҳамкоримиз бўлади.

Бундай стратегик инвесторларга лойиҳа учун ерлар бозор қийматида тўғридан-тўғри берилади. Ер тоифаси ўзгарганида нобудгарчилик учун тўловни 10 йилгача бўлиб-бўлиб тўлашга рухсат этилади. Ерни расмийлаштириш, тоифасини ўзгартириш, қурилиш ва инфратузилмага уланишга рухсатнома олиш учун инвесторлар идорама-идора юрмайди. Уларга “ягона дарча” тамойили асосида комплекс хизмат кўрсатадиган “invest.gov.uz” электрон платформаси ишга туширилади ва барча вазирликлар бунга уланади.

Шу билан бирга, эркин иқтисодий зоналарга дунёнинг машҳур брендларини жалб қиламиз. Ушбу зоналардаги корхоналар халқаро техник регламентлар, экологик ва меҳнат стандартларини қўллаши мумкин бўлади. Улар учун махсус – имтиёзли инвестициявий, солиқ, божхона ва ҳуқуқий режим жорий этилади ва халқаро ҳуқуқ доирасида арбитраж низоларини кўриб чиқиш имконияти яратилади.

Буларнинг барчаси – келгуси беш йилда 180 миллиард долларлик хорижий инвестиция ҳисобидан 1 миллион юқори даромадли иш ўринларини яратишга хизмат қилади.

Юртимизга инвестициялар оқимини кўпайтириш бўйича ҳам жуда катта режаларимиз бор. Шунинг учун ҳар бир келишувни лойиҳага айлантириш, сармояларни қисқа фурсатда жалб қилиш ва уларнинг самарадорлигига масъул, фақат ва фақат инвестиция билан ишлайдиган алоҳида янги тизим ташкил этилади.

Бундан ташқари, маҳаллий саноат ва кооперацияни ривожлантириш бўйича ҳам худди шундай алоҳида тизимни йўлга қўйиш мақсадга мувофиқдир.

Умуман, иқтисодиётни рақобатдош қилиш, инвестициялар самарадорлигини ошириш, саноат тармоқларини технологик трансформация қилиш мутлақо янги ёндашувларни талаб этмоқда. Бунинг учун Иқтисодиёт ва молия, Инвестициялар, саноат ва савдо вазирликлари фаолияти тубдан қайта кўриб чиқилади.

Янги технологик босқичга ўтиш ва қўшилган қиймат занжирини кенгайтириш бўйича саноатни ривожлантириш дастурини бошлаймиз. Бунда келгуси беш йилда саноатда қўшилган қийматни ҳозирги 36,5 миллиард доллардан камида 60 миллиард долларга етказишни (ўсиш 1,6 баробар); юқори ва ўртадан юқори технологияли тармоқлардаги маҳсулотлар ҳажмини 2,5 баробар оширишни марра сифатида белгилаймиз. Бунга пухта тайёргарлик кўриш мақсадида 2026 йилда 52 миллиард долларлик 782 та янги саноат ва инфратузилма лойиҳасига старт берилади.

Келгуси йилнинг ўзида 14 миллиард долларлик 228 та янги йирик қувват ишга туширилади. Масалан, Навоийдаги олтин конларида маъдан қазиб олиш бўйича 320 миллион долларлик лойиҳа (3-навбати) ишга туширилиб, қўшимча 2 миллион тонна маъдан қайта ишланади. Шунингдек, “Мурунтов” конини ўзлаштиришнинг навбатдаги босқичи ҳамда қумуш конлари бўйича 2 миллиард 300 миллион долларлик йирик лойиҳалар амалга оширилади. Натижада йилга 18 миллион тонна маъдани қайта ишлаш қуввати барпо этилиб, 2030 йилгача олтин ишлаб чиқариш ҳажми 175 тоннага етказилади.

Яна бир йирик лойиҳа – Олмалиқ комбинатида қиймати 2 миллиард 700 миллион доллар, қуввати 300 минг тонна мис катодидан иборат бўлган янги металлургия мажмуасини барпо этиш бошланади.

“Самарқанд кимё” заводида 381 миллион доллар инвестиция ҳисобидан йилига 370 минг тонна фосфорли ва 540 минг тонна мураккаб ўғитлар ишлаб чиқариш йўлга

қийматининг 5 фоизи миқдорида субсидия берилади. Корхона мутахассисларининг илмий-тадқиқот ва конструкторлик ишланмаларидан олган даромади солиқдан озод қилинади.

Ана шундай ислохотлар орқали келгуси беш йилда саноатда меҳнат унумдорлиги ҳозирги 16,5 минг доллардан 30 минг долларга етказилади; 1 минг долларлик қўшилган қиймат яратишга кетадиган энергия сарфи 1,5 баробар камайтирилади.

Бу йил ИТ, финтех, сунъий интеллект каби йўналишлардаги маҳаллий стартапларга хориждан 270 миллион доллар инвестиция жалб қилдик. Кейинги йилдан “Рақамли стартаплар” дастурини кенгайтириб, стартап ғоясидан то экспортгача қўмаклашадиган янги тизимни йўлга қўямиз. Бунда хусусий стартап марказларини ташкил этиш учун Ёшлар жамғармасидан беш йил муддатга 5 миллиард сўмгача фоизсиз ссуда берилади. Олийғоҳларнинг ўзида қоладиган маблағларнинг 10 фоизи ҳам инкубация марказларини ривожлантиришга йўналтирилади.

Бундан ташқари, Марказий банкда Финтех офиси ва Инновацион хаб ташкил этилиб, унга Сингапурдан мутахассислар жалб қилинади. Бу орқали йилига 20-30 та финтех стартапни ташқи бозорга олиб чиқиш, уларга жами 1 миллиард доллар инвестиция жалб этиш имконияти яратилади.

Умуман, венчур фондлар, стартаплар, финтех каби янги молиявий инструментлар бозорини ривожлантириш, бу соҳадаги барча иштирокчилар ҳуқуқларини қонун билан кафолатлаб қўйиш зарур.



қўйилади.

Қашқадарёда 200 миллион долларлик янги кимё заводи қурилиши бошланади.

Умуман, 2026 йилда кимё саноатида – 4,5 миллиард долларлик; тоғ-кон металлургия, нефть-газ, автомобилсозлик, тўқимачилик ва қурилиш материаллари тармоқларининг ҳар бирида – 3 миллиард доллардан; электротехникада – 2 миллиард долларлик; фармацевтикада – 800 миллион долларлик янги лойиҳалар бошланади. Шу тариқа 2026 йилда жами экспортимизни 40 миллиард долларга етказиб, тайёр ва ярим тайёр маҳсулот улушини 55 фоиздан оширамиз. Келгуси йили иқтисодиётда 6,6 фоиз ўсишни таъминлаб, ялпи ички маҳсулотни 167 миллиард долларга етказиш прогноз қилинмоқда. Агар меҳнат унумдорлиги, энергия самарадорлиги ва таннарх бўйича қаттиқ ишланса, бу кўрсаткични янада ошириш учун барча имкониятлар бор.

Шу боис саноатда “Унумдорлик ва самарадорликни икки карра ошириш” дастурини бошлаймиз. Иқтисодиёт ва молия вазирлиги томонидан меҳнат унумдорлиги ва энергия самарадорлиги бўйича алоҳида лойиҳа амалга оширилади. Ушбу лойиҳага халқаро молия институтларидан 200 миллион доллар кредит ва грант жалб қилиниб, саноат корхоналари учун хориждан юқори малакали технолог ва муҳандислар олиб келинади; бизнес жараёнлари рақамлаштирилади; энергия ва бошқа харажатларни қисқартириш бўйича аудитлар ўтказилади; илгор технологиялар трансфер қилинади.

Бу борада “Тўртинчи саноат инқилоби маркази” ташкил этилади. Марказ негизида робототехника, интернет буюмлари, “ақлли” фабрика каби “Индустрия 4.0” ечимларини саноат корхоналарида жорий этиш учун “тартибга солиш механизми” яратилади. Бунда корхоналар янги технологияларни ишлаб чиқаришга жорий қилишдан олдин уларни синовдан ўтказиш имконига эга бўлади.

Аккредитация, метрология ва стандартлаштириш соҳаларидаги ислохотларимиз натижасида Ўзбекистон “Глобал сифат инфратузилмаси” индексида сўнгги икки йилда 15 поғона юқорилаб, 185 та давлат ичида 52-ўринга қўтарилди.

Бу, албатта, яши. Шу билан бирга, маҳсулотларимиз рақобатдошлигини янада ошириш учун техник тартибга солиш соҳасини янги босқичга олиб чиқамиз. Бунинг учун “Давлат назорати” тизимидан халқаро тажрибада юқори самара берган “Бозор назорати” тизимига ўтамиз. Шунингдек, инновация асосида юқори технологик маҳсулот ишлаб чиқараётган корхоналарни рабатлантирамиз. Улар шундай маҳсулотни ўтган йилга нисбатан оширса, кўпайган маҳсулот ҳажми

тўғрисида”ги янги қонун лойиҳасини тез фурсатда қабул қилиш лозим.

Курс тебраниши бўйича хатарларни камайтириш учун маҳаллий компанияларга ички бозорда ҳам хорижий валютада облигация чиқаришга рухсат берилади.

Келгуси йили корхоналаримиз илк бор халқаро бозорларда ҳам акцияларини жойлаштириши мумкин бўлади.

Умуман, капитал бозорини ривожлантириш орқали тадбиркорларга қўшимча 1 миллиард доллар жалб қилиш имконияти яратилади.

2026 йилда яширин иқтисодиётни қисқартириш бўйича ҳам туб бурилишни амалга оширамиз. Кўрган чора-тадбирларимиз натижасида кузатилмайдиган иқтисодиёт улушини 45-50 фоиздан 28 фоизга пасайтиришга эришдик. Лекин бу ҳали дастлабки қадамлар, холос.

Бу борадаги ишларни кучайтириш учун алоҳида дастур қабул қилдик. 2026 йилда барча давлат хизматлари ва коммунал тўловлар, ёқилғи, алкоголь ва тамаки маҳсулотлари, автомобиль ва кўчмас мулк савдолари нақдсиз тўлов шаклига ўтказилади; солиқ, божхона, санитария-эпидемиология назорати, стандарт, карантин, қурилиш назорати инспекцияси, ёнғин хавфсизлиги каби 17 турдаги текширувларда “боди-камера”дан фойдаланиш мажбурий бўлади.

“Соя”даги иқтисодиётдан иктиёрий равишда шаффофликка чиқмоқчи бўлган тадбиркорлар бухгалтерия, статистика, солиқ ҳисоботларини юритиш бўйича бепул ўқитилади.

Умуман, дастур доирасида келгуси беш йилда яширин иқтисодиёт улуши 2 карра қисқартирилади; савдо ва сервис соҳаларида нақд пулсиз тўловлар улуши 75 фоиздан оширилади; расмий секторда банд бўлган аҳоли сони ҳозирги 8,5 миллиондан 14 миллионга етказилади.

Бир сўз билан айтганда, “Ҳалол меҳнат – хотиржам ҳаёт ва фаровон жамият гарови” деган шиор асосида бу борадаги ишлар умуммиллий ҳаракатга айлантирилади.

Айрим юртдошларимизда топган даромадини иқтисодиётга йўналтириш, банк депозитига жойлаштириш, активларини ўз номига расмийлаштириш билан боғлиқ хавотирлар бор. Шу боис депутатларимиз ва Марказий банк халқаро ташкилотлар билан маслаҳатлашган ҳолда, фуқароларимиз юртимизда ёки чет элда шу пайтгача олган даромад ва активларидан эмин-эркин фойдаланишига шароит яратиш бўйича таклифлар тайёрласа, ўйлайманки, тўғри бўлади.

Ҳурматли парламент аъзолари!
Энди, руҳсатингиз билан, **учинчи устувор йўналиш – ички бозорда талабни рағбатлантириш** масаласига тўхталмоқчиман.

Бозорларимиздаги тўқинлик, нарх-наво барқарорлиги, аҳолининг истеъмол талаби ортиб бораётгани – турмуш сифати яхшиланаётганини кўрсатадиган энг асосий омил.

Ички талабни рағбатлантирадиган муҳим факторлардан бири, бу – инфляция даражасидир.

Биз тўққиз йилда қулай бизнес муҳитини яратиб, товар ва хизматлар ҳажми ва турини кўпайтирганимиз; аҳолини даромадли қилиб, камбағалликни кескин қисқартирганимиз; кам даромадли оилалар учун ҳам йилига камида 1 миллиард доллар арзон кредит бераётганимиз; нарх-навони жиловлаб, инфляция даражасини “бир хонали” рақамга туширганимиз натижасида аҳолининг харид қобилияти 2 карра ўсди.

Биргина мисол, беш йил олдин аҳолиимиз йилига 210 мингта квартира, 600 мингта автомобиль харид қилган бўлса, бу йил 270 мингта ўй, 1 миллионга машина сотиб олди. Агар аҳолининг даромади, харид қобилияти ошмаганида, биргина кўчмас мулк ва автомобиль бозори 20 миллиард долларга етармиди?

Ўтказилган сўровлар ҳам, халқаро экспертлар таҳлиллари ҳам 75 фоиз аҳолининг молиявий ҳолати кескин яхшиланганини тасдиқламоқда. Албатта, бу натижалар билан чекланиб қолмасдан, халқимизнинг даромади ва харид қобилиятини ошириш бўйича ишларни изчил давом эттирамиз.

Таҳлилларга кўра, аҳоли даромади 10 фоизга қўпайса, истеъмол 8 фоизга ошади. Бу – янги маҳсулот ва хизматларга талаб, дегани, бу – қўшимча қувватлар, қўшимча иш ўрни, дегани.

Аҳоли эҳтиёжидан келиб чиқиб, иқтисодиётда энг катта талаб яратадиган уй-жой ипотекасига 2026 йилда 23 триллион сўм ресурс ажратамиз. Уй-жой сотиб олишда бошланғич тўлов ва фоиз тўловларининг бир қисmini қоплаш учун 2 триллион 700 миллиард сўм субсидия берилади. Шунингдек, битта квартира учун ажратиладиган имтиёзли ипотека кредити миқдори 15 фоизга оширилади.

Келгуси йилда 140 мингта квартиралар кўп қаватли уй-жой барпо этилиши рўзгор учун зарур истеъмол товарларига талабни ошириши табиий, албатта. Бу талабни молиявий манабалар билан таъминлаш мақсадида 2026 йилда жорий йилги 104 триллион сўм ўрнига 125 триллион сўмлик истеъмол кредити ажратилади.

► (Давоми 4-бетда)

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ ОЛИЙ МАЖЛИС ВА ЎЗБЕКИСТОН ХАЛҚИГА МУРОЖААТНОМАСИ

► (Давоми. Боши 1,2,3-бетларда)

Умуман, 2026 йилда қурилиш ишлари ҳажмини 11 фоизга кўпайтириб, 30 миллиард долларга етказишни режа қиляпмиз.

Бунинг иқтисодиётга қандай таъсир кўрсатишини ҳисоблаб кўрайлик. Қурилиш материали, уй-рўзғор учун тўқимачилик маҳсулотлари, электр техникаси, мебелсозлик каби тармоқлар, ушбу объектларга хизмат кўрсатадиган сервис соҳалари учун қўшимча 5 миллиард долларлик бозор бўлади. Бу – 300 мингта қўшимча янги иш ўрни дегани.

Аҳоли даромади кўпайгани хизматларга талабни ошириб, сервис соҳаси иқтисодиётнинг “драйвери”га айланиши учун катта туртки бермоқда. Бу йилнинг ўзида хизматлар ҳажми қарийб 15 фоиз ўсиб, 82 миллиард долларга етди.

Хизматларга бўлган талабни рағбатлантириш учун 2026 йилда соҳага 85 триллион сўм кредит, 9 триллион сўм субсидия ажратамиз. Хусусан, таълим хизматлари учун бюджетдан 7 триллион сўм берилади.

Кейинги беш йилда хорижий туристлар сонини 2 карра – 11 миллион нафардан 20 миллион нафарга ошириш, туризм хизматлари ҳажмини эса 20 миллиард долларга етказиш бўйича катта марра оляпмиз. Шу мақсадда туризм инфратузилмасини ривожлантиришга алоҳида эътибор қаратяпмиз. Самарқандда Бибиҳоним, Регистон мажмуалари, Амир Темур мақбараси, Улуғбек расадхонаси, Шоҳи Зинда ва Афросиёб музейини бир-бири билан боғлайдиган замонавий йўлак ва кўприклар барпо этилади.

Шаҳрисабзда “Фелон” йирик туристик мажмуасининг биринчи босқичи ишга туширилади. Поп туманида “Арашан” тоғ-дам олиш туристик зонаси ташкил этилади. Хивадаги Ичанқальъани иммерсив, яъни, “жонли” ва “ақлли” музей-шаҳарга айлантирамиз. Хоразм ва Қорақалпоғистондаги археологик ёдгорликлар бўйлаб йирик туризм ҳалқаси ташкил этилади.

Шунингдек, янги йилда тадбиркорлар томонидан 4 миллиард долларлик 3,5 мингдан зиёд янги сервис объектлари ишга туширилади. Туризм масканларини ташкил қилиш учун келгуси уч йилда 5 минг гектар ер аукционга чиқарилади.

Бундан ташқари, 2026 йилдан “Ўзбекистон мероси меҳмонхоналари” дастурини бошлаймиз. Маданий мерос объектларида хусусий шериклик асосида “бутик меҳмонхона” ташкил қилиш учун нуфузли меҳмонхона тармоқлари олиб келинади. Дастур иштирокчиларига ер, мулк, фойда солиқлари ва божхона тўлови бўйича имтиёз берилади.

Мана шу ишлар ҳисобига 2026 йилда хизматлар бозорини 100 миллиард доллардан оширамиз.

Туристлар оқими тобора ошаётгани авиация ва темир йўлда йўловчи ташиш қувватини 2 баробар кўпайтиришни тақозо этмоқда. Шу боис 2026 йилда авиапаркдаги ҳаво кемалари сонини 105 тадан 120 тага етказамиз. Маҳаллий авиақатновлар сонини ошириш учун субсидиялашнинг янги тизими жорий этилади.

Энди, нархидан қатъи назар, сотилган ҳар бир чипта учун аниқ миқдорда субсидия ажратилади. Бу – чипта нархини пасайтириш ва талабни оширишга хизмат қилади.

Шу билан бирга, янги самолётларимиз учун учувчилар, уларга техник хизмат кўрсатувчилар, аэропортлар учун сервис ва бошқарув соҳасида малакали мутахассисларни тайёрлаш мақсадида Фуқаро авиацияси университети ташкил этилади.

Жанубий Кореянинг “Hyundai Rotem” компаниясидан 6 та теззорар поезд олиб келамиз. Бунинг биринчи таркиби яқин кунларда келади.

Умуман, ички темир йўлларни ривожлантириш бўйича беш йиллик дастур қабул қилинади.

Шаҳарларни теззорар поездлар қатнови билан боғлаш учун 2026 йилдан яна 500 километр темир йўл қуришга киришамиз. Келгуси йили 110 километр темир йўл тармоғи қурилиб, Бўка, Пискент, Бекобод, Боёвут туманлари ҳамда Нурафшон шаҳри пойтахт билан боғланади. Тошкент – Самарқанд йўналишида юқори тезликда ҳаракатланадиган йўловчи поездлар учун янги темир йўл линияси қуришни бошлаймиз. Тошкент, Самарқанд, Бухоро, Хива, Навоийдаги вокзаллар ҳам хусусий шериклик учун берилади.

Бирлашган Миллатлар Ташкилоти таҳлилига кўра, сифатли йўллар иқтисодиётимизнинг камида 2 фоиз ўсишига туртки беради.

Автомобиль йўлларининг сифатини яхшилаш, транзит салоҳиятини янада ошириш мақсадида беш йиллик дастур амалга оширилади. Бунда Андижон билан Қўнғиротни, Тошкент билан Термизни, Самарқанд билан Шаҳрисабзни, Олот билан Сариосиёни боғлайдиган, узунлиги 4 минг километр магистрал йўлларни халқаро талабларга мос “автобан”ларга айлантирамиз.

2026 йилнинг ўзида Қорақалпоғистон, Бухоро, Қашқадарё ва Сурхондарё ҳудудидан ўтган умумий фойдаланишдаги 300 километр йўлларда реконструкция

ишлари якунланади.

Тошкент – Самарқанд, Тошкент – Андижон, Тошкент – Бўстонлиқ, Пунғон – Наманган ва Қарши – Шаҳрисабз йўналишида юқори тезликда ҳаракатланишга мўлжалланган 800 километр йўллар қурилишига катта тайёргарлик кўриб, ҳамкорларни белгилаб олдик.

Тошкент – Самарқанд йўлининг қурилиши март ойидан, қолган йўллар бўйича амалий ишлар эса 1 июлдан кечиктирмасдан бошланади. Яна 1 минг 200 километр йўллар 2030 йилгача халқаро молия институтлари билан ҳамкорликда қайта қурилади.

Энди йўлларни лойиҳалаштиришда аҳолининг фикри, транспорт қатновининг аэроф-мухитга таъсирини инобатга олиш, пиёдалар учун “тўсиқсиз” муҳит яратиш бўйича қатъий талаблар қонун даражасида мустаҳкамланади.

Йўл қурилишига илғор технология ва стандартларни жорий этиш устувор тамойил сифатида белгиланади. Парламентимиз “Автомобиль йўллари тўғрисида”ги қонунни янги тахрирда қабул қилишда йўлларни режалаштириш тизимини назарда тутса, мақсадга мувофиқ бўлади.

Аҳолининг даромади, хорижий туристлар оқими тобора ортиб бораётгани келгуси беш йилда озиқ-овқатга бўлган талабни 1,5 карра оширади. Шунинг учун қишлоқ хўжалиги маҳсулотларини ҳажмини ҳозирги 40 миллиарддан 60 миллиард долларга етказиш бўйича катта марра оламиз.

Икки ҳафта олдин аграр соҳа вакиллари билан учрашиб, қишлоқ хўжалигида ҳосилдорликни янги технологиялар асосида ошириш бўйича барча масалаларни ечими билан муҳокама қилиб олдик.

Умуман, янги йилда қишлоқ хўжалигини қўллаб-қувватлаш учун 52 триллион сўм ажратамиз.

Озиқ-овқат маҳсулотларини халқимизга барқарор нархда етказиб бериш ҳам тўлиқ ислоҳ қилинади. Бозорларимизни асосий озиқ-овқат маҳсулотлари билан йил – ўн икки ой барқарор нархда таъминлаш учун 2026 йилдан доимий интервенция



тизимига ўтамиз. Ҳудудлардаги “Озиқ-овқат жамғармалари”га ажратиладиган ресурсни 2,5 баробар кўпайтириб, 500 миллиард сўмга етказамиз. Шунингдек, мева-сабзавотга ихтисослашган 1 мингта маҳаллада сигими 100 тоннагача бўлган кичик совиткичли омборлар барпо этилади.

Бу ишларимиз келгуси йил инфляция даражасини 6-6,5 фоизга туширишга хизмат қилади.

Мухтарам ватандошлар!

Касбларни ривожлантириш ва янги меҳнат бозори архитектурасини яратиш – келгуси йил учун даражасининг тўртинчи устувор йўналишидир.

Ҳозирги вақтда янги технологиялар, рақамлаштириш ва сунъий интеллект таъсирида дунёда иш ўринларининг сони, шакли ва мазмуни кескин ўзгармоқда. Яқин беш йилда мавжуд касбларнинг 30 фоизи тўлиқ автоматлаштирилади, 50 фоизи бўйича эса янги малакалар талаб қилинади.

Бу жараёнлар бизни ҳам четлаб ўтаётгани йўқ. Саноатда – автоматлашган линиялар, аграр соҳада – ақлли технологиялар, транспортда – интеллектуал бошқарув кундалик ҳодисага айланиб бормоқда.

Энди мамлакатимизнинг меҳнат бозори мутлақо янги архитектура асосида – касб, малака, технология ва таълимни бирлаштирадиган ягона механизм сифатида ишлаши зарур.

Мутахассисларнинг фикрича, болада бирор-бир касбга қизиқиш 7-синфдан бошланиб, қайси касбни танлаши 9-синфда тўлиқ маълум бўлади. Шу боис 9-синф битирувчиларини фанларни ўзлаштириши ва касбий қизиқишига қараб саралаб олиш тизимини жорий қиламиз. Бунда олийгоҳларга кириш истагида бўлмаган ёшлар техникумларга юборилади.

Яқинда техникумларга замонавий қиёфа ва янгича муҳит олиб кириш бўйича беш йиллик дастурни тасдиқладик.

Менинг ниятим – ёшларимиз талаб юқори бўлган касблар бўйича дунёда рақобатдош бўлсин, керак бўлса, бошқалардан бир поғона устун турсин. Ушбу мақсадга эришиш йўлида касбий таълимнинг энг муҳим бўғини бўлган техникумларни янги сифат босқичига олиб чиқамиз. Бунинг учун 2026 йилдан

бошлаб, ҳар йили камида 100 тадан техникумни тўлиқ таъмирлаб, технологик ва талаб юқори бўлган касбларга мос ҳолда жиҳозлаб борамиз. Германия, Швейцария, Буюк Британия, Хитой, Корея каби давлатларнинг илғор таълим дастурлари жорий қилинган техникумлар сонини 100 тага етказамиз.

Бугун сизларга яна бир янгиликни етказмоқчиман: 2026 йилда 7 та вилоятда, 2027 йилда эса қолган ҳудудларда Илғор касбий маҳорат техникуми ва “Касблар шаҳарчаси” фаолияти йўлга қўйилади. Бунда Илғор касбий маҳорат техникумлари ҳудуддаги бошқа техникумлар учун методик ва амалиёт базаси сифатида фаолият юритса, “Касблар шаҳарчаси” – мактаб ўқувчиларини қурилиш, сервис, қишлоқ хўжалиги, саноат, транспорт, “яшил” энергетика каби соҳалардаги замонавий касбларга йўналтиришга хизмат қилади.

Бу тизимни мамлакатимизда уч йил олдин йўлга қўйиб, ўқувчилар қамровини 15 фоизга етказдик.

Бугун автомобилсозлик, “яшил” энергетика, қурилиш, транспорт, тўқимачилик, қишлоқ хўжалиги, туризм, сервис, IT каби йўналишларда 70 мингга яқин ўқувчи “дуал таълим” асосида ўқиб, ойига 10 миллион сўмгача маош олмақда.

Энди техникум ва иш берувчилар ўртасидаги ҳамкорликни янги босқичга олиб чиқамиз. Хусусан, “дуал таълим” асосида ўқитишни самарали ташкил қилган корхоналарга 7 йил муддатга 5 миллиард сўмгача имтиёзли кредит ажратилади; тадбиркорлик рейтингда қўшимча 5 балл берилади; корхоналар ишга олган техникум ўқувчиси учун 1 фоизли ижтимоий солиқ имтиёзи яна уч йилга узайтирилади.

Шунингдек, 2026 йилдан бошлаб техникумларда таълим олаётган 100 минг ўқувчига илк бор стипендия тўланади; “аъло” баҳоларга ўқиётган, танлаган касбини пухта эгаллаётган фарзандларимизга эса оширилган миқдордаги стипендиялар берилади.

Иқтисодиётнинг устувор йўналишлари учун юқори интеллектуал салоҳиятга эга

бола саломатлигини муҳофаза қилиш йўналишларига ўтган йиллардан 1,5 баробар кўп – 3,5 триллион сўм ажратамиз.

Кадрли дўстлар!

Экологик мувозанатни таъминлаш, “яшил” энергетика ва сув ресурсларидан оқилона фойдаланиш бешинчи устувор йўналишимиздир.

Йирик корхоналарга филътр, тозалаш иншооти ва ҳавога чиқариладиган зарарли моддаларни мониторинг қилиш станцияси ўрнатиш учун биринчи босқичда 100 миллион долларлик кредит линияси очилади.

Келгуси йили Самарқандда Глобал экологик жамғарманинг навбатдаги ассамблеяси ва Марказий Осиё халқаро экоқўргазмаси ўтказилиши режалаштирилган. Ушбу тадбирлар тармоқлар, ҳудудлар ва бизнес учун ҳамкорлар топиш, янги эколойиҳаларни биргаликда бошлашга катта имконият яратади.

Тошкент шаҳри ва Тошкент вилоятида 2 мингта яқин кўмир ва газда иситиладиган иссиқхона бор. Улардан ҳавога йилига 137 минг тонна зарарли модда чиқади. Энди кўмирда филътрсиз ишлайдиган қозонхоналардан воз кечамиз. Уларни пойтахт атрофидан кўчириб, ҳамма жойда марказлашган қозонхоналар орқали иситишни йўлга қўямиз. Шу мақсадда 200 гектардан кам бўлмаган агрокластерлар ташкил этилади, уларнинг таркибига ўтадиган иссиқхоналарга алоҳида субсидия берилади.

Шаҳарларимиздаги тирбандликлар нафақат одамлар ҳаётини қийинлаштирмоқда, балки экологияга ҳам жиддий зарар етказмоқда. Шу боис дунё тажрибасидан келиб чиқиб, автомобиллар чиқараётган зарарли моддалар даражасига қараб, экологик стикерлар тизими жорий этилади. Катта миқдорда зарарли моддалар чиқарадиган автомашиналарнинг пойтахт ва вилоят марказлари ҳамда шаҳарларга кириши чекланади. Бундай транспорт воситаларини янгисига алмаштириш ёки уларга филътр ўрнатиш учун давлат томонидан қўллаб-қувватлаш чоралари кўрилади.

Бунинг учун алоҳида Жамғарма ташкил қилинади. Эски машинасини алмаштираман деганларга автокредит фоизининг бир қисми қоплаб берилади. Филътр ўрнатиб, зарарни камайтиришга тайёр бўлган ҳайдовчилар учун харажатларининг бир қисми бўйича субсидия ажратилади.

Азим пойтахтимиз ва йирик шаҳарларда жамоат транспортини ривожлантириш устувор вазифамиз бўлади. Шаҳар кўчаларида автобус ва таксилар учун махсус йўлақлар кўпайтирилади. Тошкент, Самарқанд ва Наманган шаҳарларида транспорт ҳаракатини интеллектуал светофорлар орқали бошқариш тизими жорий этилади.

Экологик автомобилларни кўпайтириш бўйича беш йиллик дастурни амалга оширамиз. Бунда маҳаллий электромобилларга 12 фоизли, хорижий электромобилларга эса 16 фоизли автокредитлар ажратилади.

Электромобилларни қувватлаш станцияларини ташкил қилиш учун тадбиркорларга 10 фоизли имтиёзли кредитлар берилади; ерларни аукциондан 2 карра арзон нархда сотиб олиш имконияти яратилади.

Электромобилларни қувватлаш станцияларида автомобилларни зарядлашда 1 киловатт-соат электр энергияси нархининг 300 сўмдан ошган қисми давлат бюджетидан қоплаб берилади.

Электромобилда такси хизмати кўрсатадиган фуқароларга ҳам бир қатор имтиёзлар берилади.

Энг асосийси, бу ишларни тўғри йўлга қўйсак, пойтахтимиз, вилоят марказлари ва йирик шаҳарлар фақат экотранспортлар ҳаракатланадиган ҳудудга айланади.

Чанг-тўзонларнинг олдини олиш учун Сурхондарёда 10 минг гектарда “яшил макон” ва Сирдарёда 84 километрли “яшил девор” барпо этилади. Қорақалпоғистон, Хоразм, Бухоро ва Навоийда жами 250 минг гектар, жумладан, Оролнинг қуриган тубида 115 минг гектар ерда дарахт ва буталар экилади.

Ҳар бир ҳудудда ботаника ва дендрология боғлари ҳамда 20 тадан соя-салқин сайр кўчалари барпо қилинади.

Корхоналарда экостандартларни жорий қилиш учун келгуси беш йилда камида 30 минг нафар экология менежерига талаб пайдо бўлади. Шунинг учун 2026 йилда ҳар бир ҳудудда “яшил” техникумлар ташкил этилиб, дуал таълим асосида йилига 10 минг мутахассис тайёрлаш йўлга қўйилади.

Янги йилда Марказий Осиё Яшил университети фаолиятини кенгайтирамиз. Ҳаво, сув ва тупроқ сифатини аниқлаш имконини берадиган комплекс лабораториялар ташкил этилади. Шаҳарларда табиий вентиляцияни кучайтиришга қаратилган тадқиқотлар ўтказилади.

Умуман, экология соҳасига 2026 йилда 1 триллион 900 миллиард сўм йўналтирилади.

Сўнгги беш йилда 6 минг мегаваттли куёш, шамол ва гидро электр станциялари ишга туширилди, умумий генерацияда “яшил” энергиянинг улуши 30 фоизга етди.

► (Давоми 5-бетда)

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ ОЛИЙ МАЖЛИС ВА ЎЗБЕКИСТОН ХАЛҚИГА МУРОЖААТНОМАСИ

► (Давоми. Боши 1,2,3,4-бетларда)

Яқинда ҳамкорларимиз билан жами 3,5 минг мегаваттли 4 миллиард 200 миллион долларлик янги “яшил” қувватлар қурилишига старт бердик. Бу ишларимиз орқали 2026 йилнинг ўзида 7 миллиард куб метр табиий газ тежалади ва хавога 11 миллион тонна зарарли моддалар чиқишининг олди олинади.

Муҳтарам ватандошлар!

Дунёда сув танқислиги муаммоси тобора долзарб бўлиб бормоқда. Шу боис ислохотларимизнинг илк кунлариданоқ сувдан оқилона фойдаланишни давлат сиёсати даражасига олиб чиқдик.

Яқинда сувни тежайдиган технологияларни кенг қўллаш, сув иншоотларини модернизация қилиш, сўғориш тадбирлари бўйича келгуси уч йил учун қиймати 5,5 миллиард долларлик катта дастур қабул қилдик.

Дастур доирасида сувни тежайдиган технологиялар қамрови 61 фоизга ёки 2,6 миллион гектарга етказилади. Натижада йилига 2,5 миллиард куб метр сув тежалади, 200 минг тонна буғ гази камайтирилади.

Умуман, сувни тежайдиган технологияларни жорий қилиш тадбирларига 2026 йилда жами 3 триллион 300 миллиард сўм йўналтирилади.

Шунингдек, 1 минг 300 километр йирик магистрал каналлар бетон билан қопланади. Бунинг учун бюджетдан 3 триллион сўм сарфланади. Бу қўшимча равишда йилига 500 миллион куб метр сувни иқтисод қилиш имконини беради.

Бундан ташқари, жойлардаги очиқ дренаж ва коллекторларни ёпиқ тизимга ўтказиш бўйича алоҳида дастур қабул қиламиз. Ушбу мақсадларга дастлабки босқичда 2026 йил учун 100 миллион доллар ажратамиз.

Каналларни ёпиқ тизимга ўтказиш бўйича ҳам катта лойиҳаларни бошлаймиз. Қашқадарёдаги “Пахтаобод” каналини босимли қувурга ўтказиш бўйича 134 миллион долларлик лойиҳа бу борадаги биринчи қадам бўлади.

Булар орқали қўшимча равишда 20 минг гектар экин ери очилади, яна 25 минг гектар майдон кафолатли сув билан таъминланади.

Айни вақтда пойтахтимиз, вилоят марказлари ва шаҳарларда “яшил” ҳудудларни кўпайтириш учун сўғориш, дренаж тизимларини қайта тиклаш зарур. Бир сўз билан айтганда, шаҳарларнинг барча кўчаларидаги ариқларда сув айланиши керак. Бунинг учун 160 миллион долларлик катта дастур доирасида Тошкент шаҳрида 150 километр ёпиқ дренаж тизими барпо этилади, 197 километр канал ва коллекторлар таъмирланади; 63 километр янги каналлар барпо қилиниб, шаҳарда салқин микроиқлим яратилади.

Бошқа ҳудудлар раҳбарлари ҳам четдан камиди 20-25 миллион доллар маблаг олиб келиб, келгуси йилдан вилоят марказлари ва йирик шаҳарларда бундай лойиҳаларни бошлайди.

Ҳурматли депутат ва сенаторлар!

Олтинчи устувор йўналишимиз бўлган замонавий давлат бошқаруви ва адолатли суд-ҳуқуқ тизими борасидаги ислохотларимизни давом эттираемиз.

Аввало, 2026 йилдан бошлаб Электрон ҳукумат платформаси тубдан янгиланади. Энди барча давлат идораларининг мингдан зиёд давлат хизматлари; 5 мингдан ортиқ функция ва вазифалари; 200 та маълумот базаси ва ахборот тизими; 100 мингдан зиёд давлат хизматчисининг маҳалла, туман, вилоят, республика даражасидаги ваколатлари Ягона рақамли платформага интеграция қилинади.

Платформага келиб тушган мурожаатлар, уларни ижрочиларга тақсимлаш ва кўриб чиқиш муддатини назорат қилиш сунъий интеллект орқали амалга оширилади.

Содда қилиб айтганда, маҳалладан тортиб республика даражасида хал бўладиган ҳар бир масаланинг ижрочиси, муддати, ресурси бир жойда кўриниб туради.

Энг муҳими, давлат хизматларини кўрсатишда инсон омилсиз, коррупция ва ортиқча бюрократиядан холи экотизим яратамиз. Давлат хизматларини проактив ва жамланма шаклда кўрсатиш тизимини ривожлантираемиз.

Оддий сўзлар билан тушунтирсам, янги уй қурган фуқаро кадастр ҳужжатини олиш учун мурожаат қилса, янги платформа сув, электр ва газга уланиш масаласини ҳам шу захоти ҳал қилиб беради. Бундай хизматлар 2026 йилда 100 тага етказилади.

Ш.Шерматов, А.Тошқулов, У.Ҳусайнов келгуси йилда Наманган, Сурхондарё вилоятлари ва Тошкент шаҳри, шунингдек, улардаги туман ва маҳаллаларда қурилиш, адлия, олий таълим, солиқ идоралари ва уларнинг вилоят, туман бўлимларида ушбу платформани тўлиқ синовдан ўтказиши шарт.

Ҳар бир вазир, тармок раҳбари ва ҳокимлар ҳам янги йилда худди шундай ишларни ўз туманидаги тизимда йўлга қўйишни бошлаши, давлат хизматларини аҳолига янада яқинлаштириш бўйича қаттиқ ишлаши зарур.

Ҳурматли йиғилиш қатнашчилари!

Бугунги кунда Олий Мажлисимиз энг кучли парламентларга хос бўлган барча назорат ваколатларига эга. Ҳусусан, 2023 йилдан буён ташқи қарз миқдорини парламентимиз белгилаб келмоқда.

Энди давлат кафолати остида ташқи қарз олиш масаласини маъқуллашни ҳам

парламент ваколатига ўтказсак, нима дейсизлар?

Кўплаб ишлаб чиқарувчилар ва тадбиркорлар фикрини ўрганиб, 2026 йил 1 январдан давлат харидларида очиқ, шаффоф ва адолатли тизим яратаямиз. Бу – тадбиркорларимизга 300 триллион сўмлик кафолатли бозорда ўзларининг товар ва хизматлари билан фаол иштирок этишлари учун катта имкониятлар эшигини очади.

Бундан буён давлат харидларида товар, иш ва хизматларни тўғридан-тўғри сотиб олиш мумкин бўлган ҳолатлар фақат қонун билан белгиланади.

Хабарингиз бор, конституциявий ислохотларимиз доирасида вилоят ҳокимлари ва маҳаллий кенгашлар раислари лавозимларини бир-бирдан ажратган эдик. Энди бу тизим 2026 йил 1 январдан 208 та туман ва шаҳарда ҳам йўлга қўйилади. Айни пайтда ушбу жиддий сиёсий ислохот – ҳокимлар ва ижро идораларидан Кенгашларга муносабатни мутлақо ўзгартиришни талаб қилади.

Бундан буён депутат сўровлари ижроси ҳар чоракда таҳлил қилиниб, сусткашликка йўл қўйилган ҳолатлар бўйича прокуратурага тақдимнома киритилади.

Ислохотлар самарадорлигини таъминлашда фуқаролик жамияти институтларининг роли муҳим.

Шу боис уларни қўллаб-қувватлаш бўйича сиёсат келгусида ҳам изчил давом эттирилади. Хусусан, фуқаролик жамиятини ривожлантириш бўйича беш йиллик стратегия ишлаб чиқилади. Ушбу институтларга ижтимоий буюртма бериш тизими рақамлаштирилиб, молиялаштириш ҳажми 2 қарра оширилади.

Бундан ташқари, хайрия ташкилотларини тузиш тартиби соддалаштирилади, ҳисобдорлик ва шаффофлик механизмлари такомиллаштирилади.

Такор айтман, юртимиздаги кенг қўламли янгиланишлар даврида очиклик сиёсатидан ҳеч қачон ортга қайтмаймиз. Сўз ва матбуот эркинлигини таъминлаш устувор вазифамиз бўлиб қолади.

Муҳтарам депутат ва сенаторлар!

Суд-ҳуқуқ тизимини халққа

яқинлаштиришга қаратилган ишларимизни изчил давом эттираемиз.

Биз одил судлов жараёнини “рақамли суд” концепцияси асосида ташкил этишни бошладик. Энди терговни ҳам рақамлаштириш орқали инсон ҳуқуқлари ҳимоясини кучайтирамиз. Бунда жиноят ҳақидаги аризани қабул қилишдан бошлаб, ишни судга ўтказишгача бўлган босқичларга сунъий интеллект технологиялари жорий этилади ва инсон омили қисқартирилади.

Юртимизда тергов судьялари иш бошлагани – халқаро тан олинган “Хабеас корпус” институтини қўллашнинг навбатдаги муҳим босқичи бўлди. 2026 йилдан тергов судьяларига санкция ва мажбурлов чораларини ўзгартириш ҳамда бекор қилиш ваколатларини ҳам берамиз. Одил судловни амалга оширишда жамоатчилик иштироки ва ролини ошириб борамиз.

Энди жиноят процессига инглиз ҳуқуқидаги давлатларда ижобий натижа берган “халқ вакиллари хайъати” институти босқичма-босқич жорий этилади. Бунда ўта оғир ва жамиятда шов-шувга сабаб бўлаётган жиноятлар жамоатчилик вакиллари иштирокида кўриб чиқилиши суд ҳукмининг янада адолатли бўлишига хизмат қилади.

Суд қарорлари ижросини сўзсиз таъминламай туриб, фуқаро ва тадбиркорлар ҳуқуқининг ишончли тикланишига эришиб бўлмайди. Шу боис мажбурий ижро жараёнига самарали муқобил механизмларни ҳам киритамиз. Натижада соҳага сунъий интеллект жорий этилиб, келгуси икки йилда ижро ҳаракатларининг 30 фоизи инсон омилсиз амалга оширилади.

Кўрарясизлар, шиддат билан ўзгараётган дунёда гиёҳвандлик хавфи аҳоли генофонди учун энг катта таҳдидага айланиб бормоқда. Афсуски, бугунги глобллашув даврида бундай хавф-хатар Ўзбекистонни ҳам четлаб ўтмаяпти.

Бу йил 14 мингдан зиёд гиёҳвандлик жинояти қайд қилинган. Уларнинг 3 мингга яқинини ёшлар содир этгани барчамизни жиддий ўйлантириши керак.

Наркотик савдолари трансчегаравий ва виртуал характерга эга бўлиб бормоқда. Бу эса жиноятларни аниқлашда янги усулларни қўллашни, замонавий билим ва кўникмаларни пухта эгаллашни талаб қилмоқда.

Яқинда ушбу масала бўйича Миллий дастур қабул қилдик. Энди наркожиноятларга қарши курашишни умуммиллий ҳаракатга айлантириб, жамиятда бу илатга муросасиз муҳит яратамиз.

Ким бу вазифа фақат ҳуқуқ-тартибот идораларининг иши, деб ўйласа, хато қилади.

Юртимиздаги ҳар бир бола, ҳар бир ёш – бизнинг фарзандимиз, уларни гиёҳвандлик чангалига ташлаб қўйишга асло йўл қўймаймиз.

Гиёҳвандликни тағ-томири билан буткул йўқотиш, ёшларимизда кучли маънавий-руҳий иммунитетни шакллантириш бўйича барча куч ва имкониятларимизни сафарбар қиламиз.

Наркожиноятларга қарши курашиш бўйича республика ишчи гуруҳи давлат идораларининг бор кучи ва имкониятларини

ишга солиб, келгуси йилда наркотикларни ишлаб чиқариш ва тарқатиш каналларига чек қўйиш бўйича янги тизим яратсин.

Бу – Президентнинг топшириғи, бу – оналарнинг хоҳиш-истағи, бу – жамиятнинг талаби!

Тинчлик ҳукм сурган, қонун устувор бўлган, фуқароларнинг хавфсизлиги таъминланган жойга инвестиция ҳам келади, бу ерда туризм ҳам ривожланади. Лекин сўнгги пайтларда ўзини қонундан устун қўйган, тадбиркорларга босим қилиб, уларнинг бизнесини эгаллаб олишга ҳаракат қилаётган, иқтисодиётимизга жиддий путур етказадиган мураккаб молиявий жиноятларни содир этаётган, ўзини “қози” деб ҳисоблаб, одамлар ўртасидаги олди-берди масалаларини хал қилиб юрган айрим жиноий тўдалар ҳам кузатилмоқда.

Энг ачинарлиси, “осон пул топаман”, деган илинжда билагиди кучи бор айрим спортчилар ҳам бундай жиноий тўдаларга қўшилиб қолмоқда.

Яна бир ёмон жиҳати – Ўзбекистон фуқароларидан иборат жиноий гуруҳлар айрим чет давлатларда ҳам мавжудлиги юртимизнинг халқро обрўсига салбий таъсир кўрсатмоқда.

Ҳамма эшитиб олсин: бундай жиноий тўдалар фаолиятига чек қўйишга куч-қудратимиз етади ва буни албатта қиламиз!

Ўзбекистонда – фуқароларимиз,

тадбиркорларимиз ва инвесторларни ҳар қандай вазиятда ҳам ишончли ҳимоя қиладиган давлат бор, Конституция бор, қонунлар бор!

Хотин-қизларнинг кадр-қимматини жойига қўйиш, фарзандларимизни ҳимоя қилиш – қадим-қадимдан эркаклар учун шаян ва гурур масаласи бўлиб келган. Лекин жамиятимизда аёллар ва болаларнинг турли зўравонликларга учраётгани буюк тарих, юксак маънавият ва маърифатга эга бўлган, оилани муқаддас деб биладиган халқимизга асло ярашмайди.

Сўнгги икки йилда аёллар ва болаларга нисбатан оилавий зўравонлик ҳолатлари бўйича 2 мингдан зиёд жиноят аниқланган.

Ҳеч қачон унутмайлик, оилавий зўравонлик – бу фақат оиланинг ички иши эмас, бу – бутун жамиятга тегишли масала. Аёлни ўз муаммоси билан ёлғиз ташлаб қўйишга ҳеч кимнинг ҳаққи йўқ!

Аёллар ва болаларга нисбатан зўравонлиkning олдини олиш бўйича республика мувофиқлаштирувчи кенгаши барча давлат идоралари ва кенг жамоатчиликни сафарбар қилган ҳолда, бундай салбий ҳолатларга барҳам бериш бўйича самарали ишлайдиган тизим яратсин.

Парламентимиз, фуқаролик жамияти институтлари ҳам бу жараёнларда фаол иштирок этса, албатта натижа бўлади.

Такор ва такор айтман. Коррупция – давлат тараққиётига тўсиқ бўладиган, адолат ва қонун устуворлигини издан чиқарадиган, жамиятда ишонч муҳитини заифлаштирадиган энг жиддий таҳдид.

Коррупцияга йўл қўйиш эса – ислохотларимизга хиёнатдир. Бу илатга қарши курашиш бўйича 2026 йилда “фавқулодда ҳолат” эълон қиламиз.

Барча идораларда комплекс ва коррупцияга қарши ички назоратга масъул ўринбосар лавозими жорий этилади. Ҳисоб палатасининг вакили фаолияти йўлга қўйилади. Ушбу раҳбарлар тизимдаги нопок шахсларни аниқлаш, шунингдек, бюджет маблағи талон-торож бўлиши ва мансабни суиистеъмол қилиш ҳолатларининг олдини олиш бўйича таъсирчан назорат ўрнатади ва Президент олдида ҳисобот беради.

Давлатнинг ҳар бир сўм маблағи, ресурси бўйича шахсий жавобгарлик кучайтирилади. “Лавозимим, унвоним бор, менга ҳеч ким тегмайди”, деганлар адашади. Қонун олдида ҳамма тенг!

Ички ишлар, прокуратура, солиқ, божхона, молия, банк, йирик давлат компаниялари, вазирлик ва ҳокимликлар, бир сўз билан айтганда, бирорта идора ва ташкилот назоратдан четда қолмайди.

Комплаенс хизматининг фаолиятига тўқсинлик қилганлар – коррупцияга шерик, деб баҳоланади ва жавобгарлик шунга мос ҳолда бўлади.

Президент Администрацияси COMPLAENS хизмати бу тизимни 1 январдан бошлаб барча давлат идоралари ва ташкилотларида ишга тушириб, жиловни маҳкам қўлга олсин.

Мансабидан қатъи назар, порахўрлик ва суиистеъмолчилик бўйича ҳар бир ҳолат юзасидан Президент Администрацияси COMPLAENS хизмати шахсан менга ахборот киритиб боради.

Ҳурматли мажлис иштирокчилари!

Жаҳонда мураккаб геосиёсий ва иқтисодий муаммолар тобора авж олиб бормоқда. Бундай мураккаб вазиятда барча давлатлар билан тенг ҳуқуқли ва конструктив муносабатларни янада мустаҳкамлаш, вазмин ва оқилона очик ташқи сиёсат олиб боришга қаратилган фаолиятимизни давом эттираемиз.

Яқин қўшниларимиз билан кўп асрлик дўстлик, яхши қўшничилик, стратегик шериклик ва ўзаро ишонч руҳидаги алоқаларимизни янада ривожлантиришга устувор аҳамият қаратамиз. Бунда минтақамиз давлатлари ўртасидаги савдо-иқтисодий, транспорт-логистика, энергетика, сув, экология, хавфсизлик, маданият ва таълим соҳаларида ҳамкорликни янада чуқурлаштирамиз.

Афғонистон билан савдо-иқтисодий ҳамкорликни кенгайтириш, уни минтақадаги

иқтисодий жараёнларга кенг жалб қилиш асосий мақсадларимиздан бири бўлиб қолади.

Асосий хорижий шерикларимиз

ҳисобланган Россия, Хитой, Америка Қўшма Штатлари, Туркия, Германия, Франция, Италия, Буюк Британия, Жанубий Корея, Япония, Саудия Арабистони, Бирлашган Араб Амирликлари, Қатар, Иордания, Кувайт, Умон, Ҳиндистон, Покистон ва бошқа давлатлар билан кўпқиррали ва ўзаро манфаатли алоқаларни янада кенгайтириш бундан буён ҳам эътиборимиз марказида бўлади.

Шунингдек, Жануби-Шарқий Осиё, Яқин Шарқ, Африка, Лотин Америкаси мамлакатлари билан янги ва истикболли йўналишларда манфаатли ҳамкорликни мустаҳкамлаш, Жанубий Кавказ ва Жанубий Осиё мамлакатлари билан муносабатларни кенгайтириш стратегик йўналишларимиздан бири бўлади.

Фурсатдан фойдаланиб, бугунги анжуманимизда қатнашаётган хорижий давлатларнинг муҳтарам элчиларига қарата айтмоқчиман: биз билан алоқаларни кенгайтириб, Ўзбекистоннинг Жаҳон савдо ташкилотига аъзо бўлишини фаол қўллаб-қувватлаётгани учун мамлакатларингиз ҳукуматларига алоҳида ташаккур билдираман.

Нуфузли халқро ва минтакавий ташкилотлар, иқтисодий институтлар билан яқин ҳамкорликни янги босқичга олиб чиқамиз.

Халқаро валюта жамғармаси, Жаҳон банки, Осиё тараққиёт банки, Ислом тараққиёт банки, Европа тикланиш ва тараққиёт банки, Осиё инфратузилмавий инвестициялар банки ва бошқа етакчи молия институтлари билан ҳамкорликда иқтисодиётимизни технологик модернизация қилиш, инфратузилмани ривожлантириш, барқарор энергетика ва транспорт лойиҳаларини амалга ошириш борасидаги ишларни давом эттирамиз.

Мустақил Давлатлар Ҳамдўстлиги, Шанхай ҳамкорлик ташкилоти, Туркий давлатлар ташкилоти, Ислом ҳамкорлик ташкилоти доирасида анъанавий, кенг қамровли шериклик алоқаларини янада кенгайтираемиз.

Бундай улугвор вазифалар биздан юртимизда тинчлик ва барқарорликни, миллатлар ва динлараро дўстлик ва аҳилликни янада мустаҳкамлаш, Қуроли Кучларимизнинг жанговар салоҳиятини оширишни талаб этади. Бунинг учун биз барча зарур чора-тадбирларни амалга оширамиз.

Азиз ватандошларим!

Бугун сизлар билан 2026 йил ва келгуси беш йил учун катта марраларни белгилаб олдик.

Эришилган улкан натижалар, янги устувор вазифалар “Ўзбекистон – 2030” стратегиясини қайта кўриб чиқишни тақозо этмоқда. Юртимизнинг келгуси беш йиллик тараққиётга дахлдор бўлган ушбу ҳужжат кенг жамоатчилик муҳокамасидан ўтказилиб, аҳолиимизнинг фикр-мулоҳазалари асосида такомиллаштирилади. Парламент вакиллариини ҳам бу жараёнда ўз тақлифлари билан фаол иштирок этишга чақираман.

Келгуси йилда маънавият соҳасини янада ривожлантириб, ижтимоий-маданий ҳаётимиздаги муҳим саналарни кенг нишонлаймиз. Жумладан, барча ютуқ ва ғалабаларимизнинг пойдевори бўлган Ватанимиз мустақиллигининг шонли 35 йиллигини катта байрам сифатида ўтказамиз.

Шунингдек, Соҳибқирон Амир Темур, Мир Алишер Навоий боболаримизнинг қутлуг таваллуд айёмларига тайёргарликни ҳозирдан бошлашимиз керак. Бундай улуг саналарни юксак даражада, ҳар томонлама муносиб ўтказиш учун, албатта, тегишли қарорларни қабул қиламиз. Уларни амалга оширишда маҳаллалар, таълим-тарбия масканлари, меҳнат жамоалари, зиёлиларимиз, хориждаги элчихоналаримиз, умуман, бутун халқимиз фаол иштирок этади, деб ишонамиз.

Қадрли ва муҳтарам юртдошлар!

Бугун сизларга, сизлар орқали бутун эл-юртимизга мурожаат қилиб айтмоқчиман: бугун тарихнинг ўзи, ҳаётнинг ўзи зиммамизга буюк бир масъулиятни юклямоқда.

Жонажон Ватанимиз бугун алоҳида сиёсий-ҳуқуқий, ижтимоий, маънавий муносабатлар асосида яшаб, меҳнат қилаётган, мустақил фикрлайдиган, озод ва эркин инсонлар диёрига айланмоқда.

Ҳаммамизга аёнки, Мирзо Улуғбек бобомиз бундан олти аср муқаддам инсоният учун юлдузлар харитасини яратган эди. Бугун эса биз ҳозирги ва келажак авлодларимиз учун бахтли ҳаётга олиб борадиган йўл харитасини яратишимиз лозим.

Мана шу ҳақиқатни чуқур ҳис этиб, барчамиз биллашиб ҳаракат қилсак, ҳар қандай юксак маррани забт этишга қодирмиз, бирон-бир куч бизни ўз йўлимиздан қайтара олмайди.

Бир бўлсак, ягона халқ, ягона миллат бўлиб олға интилсак, қўзлаган улкан мақсадларимизга, албатта, етамиз!

Мен бу йўлда мард ва олижаноб халқимизга ишонаман!

Ўзбекистоннинг беқиёс кучи ва имкониятларига, азиз ёшларимизнинг азму шижоотига ишонаман!

Фурсатдан фойдаланиб, эл-юрт манфаати, Ватан тақдирини ўйлаб, муқаддас заманимизнинг асл фарзандларини, фидойи посбонлари бўлиб, ўзини аямасдан, сидқидилдан меҳнат қилаётган сиз, азизларга, бунёдкор халқимизга чин дилдан миннатдорлик билдираман.

Барчангизга мустаҳкам саломатлик, оилавий бахт-саодат, янги йилда улкан ютуқ ва омадлар тилайман.



БИРДАМЛИК – ҚУДРАТЛИ ВА БУНЁДКОР КУЧ



Улуғбек ИНОЯТОВ,
Ўзбекистон ХДП
Марказий Кенгаши раиси,
Олий Мажлис Қонунчилик
палатасидаги фракцияси
раҳбари.

Бағрикенг халқимизни, давлат ва жамиятимизни янада жипслаштирадиган, мамлакатимизда ҳамжиҳатлиқни оширадиган байрамлар, қувончли воқеалар, тарихий саналар кўп. Давлат раҳбарининг парламентга ва халқимизга Мурожаатнома йўллаши шундай муҳим воқеалардан бирига айланди, десак, асло муболаға бўлмайди.

Бу йилги Мурожаатномада сўнгги тўққиз йилда эришилган ютуқ ва натижалар аниқ рақамлар асосида таҳлил қилинди, давлат ва жамият олдида турган долзарб вазифалар кўрсатиб берилди, эзгу ниятлар билан юсак марралар белгиланди.

Мурожаатноманинг энг асосий жиҳатларидан яна бири шунда бўлдики, унда илгари сурилган таклиф-ташаббуслар, билдирилган фикрлар кўп миллатли халқимизнинг ижтимоий кайфиятини кўтарди. Ишончини янада мустаҳкамлади. Айниқса, Янги йил яқинлашиб келаётган айни кунларда барчамизга байрамона кўтаринклик бахш этди. Қайси бир соҳани олмайлик, йилдан-йилга катта ўзгариш ва янгиликлар бўлаётганини кўрамиз. Биргина ижтимоий ҳимоя ва ижтимоий хизматлар соҳасини олсак, кейинги йилларда бу йўналишда бутунлай янги тизим яратилди. Албатта, кўлами кенг, вазифаси мураккаб ижтимоий ҳимоя соҳасини барқарор йўлга солиб олиш осонлик билан бўлаётгани йўқ. Инсонни қадрлаш, унга хизмат қилишдек эзгу мақсад натижасида ҳозир юртимизнинг барча ҳудудларида 100 дан ортиқ ижтимоий хизматлар тезкор кўрсатилмоқда. Бунинг самараси ҳар бир маҳалла, ҳар бир хонадон ва ҳар бир инсон ҳаётида яққол

кўринмоқда. Давлат раҳбари алоҳида қайд этган “биз ислохотларни аниқ амалий натижага айлантиришни ўргандик”, деган фикр замирида чўқур маъно мужассам. Дарҳақиқат, жаҳон миқёсида ишлаб чиқариш, транспорт-логистика, хомашё ва молиявий ресурслар билан боғлиқ муаммолар чуқурлашиб бораётган мураккаб шароитда ҳам мамлакатимиз иқтисодиёти барқарор ўсишда давом этмоқда. Жаҳон ҳамжамияти ва нуфузли халқаро ташкилотлар томонидан эътироф этилаётгани учун ҳам натижаларнинг аҳамияти ортиб бормоқда. Иқтисодиётни ривожлантиришдан, ишбилармонликка қулай муҳит яратишдан, инвестиция лойиҳаларини амалга оширишдан қўзланган энг асосий мақсад, пиروвардида, халқимизнинг турмуш фаровонлигини ошириш, одамларни рози қилишдир. Шу маънода иқтисодиётда эришилган натижалар ижтимоий

ҳаётда бевосита акс этмоқда, миллионлаб оилалардаги муҳитни ўзгартирмоқда. Таъкидландики, жорий йилда 5 миллион аҳоли даромадли бўлиб, ишсизлик даражаси 5,5 фоиздан 4,9 фоизга тушди. Қарийб 1,5 миллион эҳтиёжманд аҳоли камбағалликдан чиқди. Бу рақамлар оддий рақамлар эмас, уларнинг ортида қанчадан-қанча машаққатли меҳнат, шижоат ва матонат бор. Бу рақамлар ортида қанчадан-қанча қувонч, яна қанчадан-қанча ишонч бор. Аслида битта оиланинг камбағалликдан чиқиши давлат ва жамият учун муҳим ҳодиса. Бу битта оиланинг рўзгори барқарор бўлди, болалари таълим-тарбияси, қўйингки, келажаги изга тушиб олди, дегани. Юртимизда камбағаллик даражаси йил бошидаги 8,9 фоиздан 5,8 фоизга тушгани қайд этилди. Ҳар бир инсоннинг барқарор фаолият ва даромад манбаига эга бўлиши мамлакат барқарорлиги учун ҳам муҳим. Камбағалликни қисқартириш узоқ йилларга хизмат қиладиган, кам даромадли оилаларнинг ҳаёти ва тасаввурини бутунлай ўзгартириб юборадиган кенг кўламли сиёсатдир. Камбағалликни қисқартириш ва маҳаллани ривожлантириш тушунчалари бир-бири билан чамбарчас боғлиқ экани ҳақида узоқ фикр юритиш мумкин. Маҳалла ривожланиши у ерда камбағаллик қисқаришини ҳам аниглайди. Тўғри таъкидланганидек, юртдошларимизнинг деярли барчаси ўзини маҳалла жамоасининг бир қисми деб ҳисоблайди. Ушбу институт, албатта, ижтимоий бирдамлик манбаига айланди. Айниқса, кейинги йиллардаги ислохотлар ва лойиҳалар натижасида маҳаллапарварлик хисси тобора юксалди. Маҳаллапарварлик ватанпарварликнинг амалий кўрinishларидан бири ҳисобланади. Мана шу асосларнинг барчасини

ҳисобга олиб, давлатимиз раҳбари 2026 йилни юртимизда “Маҳаллани ривожлантириш ва жамиятни юксалтириш йили” деб эълон қилишни таклиф этганида залдагилар ҳамжиҳат, ҳамфикр бўлиб қўллаб-қувватлади. Аминманки, кейинги йилга яхши ният билан бундай улуг ном берилиши халқимизнинг кўнглидаги истакнинг ифодаси бўлди. Келгуси йилдан маҳаллани ривожлантириш бўйича комплекс ёндашув жорий этилиши билдирилди. Жумладан, ҳар бир вилоятда 2-3 тадан туманни танлаб, маҳалладаги барча муаммоларни бир вақтнинг ўзида ҳал қиладиган тизим яратилади. Бу бир неча йил давомида амалга оширилган “Обод маҳалла” дастури бир неча баробар кенгайишини аниглайди. Эндilikда маҳалла ободлигидан туман ободлигига ўтилиши маҳалламизнинг бир вақили сифатида ҳаммамизни қувонтиради. Мурожаатномада келгуси йил учун дастурнинг яна бир устувор йўналиши касбларни ривожлантириш ва янги меҳнат бозори архитектурасини яратиш бўлиши кераклиги тушунтирилди. Дунё кундан-кунга ривожланиб, иқтисодиётнинг таркиби ўзгариб борапти. Таҳлиллар яқин беш йилда мавжуд касбларнинг 30 фоизи тўлиқ автоматлаштирилиши, 50 фоизи бўйича эса янги малакалар талаб қилинишини кўрсатмоқда. Бу рақамлар – замонавий иқтисодиётнинг жиддий чақириғи. Шу маънода мамлакатимиз меҳнат бозори – касб, малака, технология ва таълимни бирлаштирадиган ягона механизм сифатида ишлаши зарурлиги ҳақидаги фикр стратегик аҳамиятга эгадир. Айниқса, мамлакатимиз меҳнат бозорига йилига 300 минг нафар олий маълумотли кадрлар кириб келаётгани масъулиятни янада оширади. Мурожаатномада ижтимоий, иқтисодий йўналишлар билан бирга, сиёсий-демократик

йўналишдаги концептуал ислохотларга ҳам алоҳида эътибор қаратилди. Хусусан, конституциявий ислохотлар доирасида бир-биридан ажратилган ҳокимлар ва маҳаллий кенгашлар раислари лавозимлари 2026 йилдан 208 та туман ва шаҳарда ҳам йўлга қўйилиши таъкидланди. Демократик нуқтаи назардан бу жуда характерли қадамга айланади. Чунки, давлат ҳокимияти органларининг бир-бирини тийиб туриш тамойили ишлаши ва халқимиз манфаатларига хизмат қиладиган натижалар бериши мана шу ислохот билан чамбарчас боғлиқ бўлиб турибди. Айни пайтда депутат сўровлари ижроси ҳар чоракда таҳлил қилиниши, суствашликка йўл қўйилган ҳолатлар бўйича чоралар кўрилиши сайловчилар, партияимиз электорати мурожаатларига эътибор ва масъулият кучайишига асос бўлади. Худудларда ҳам демократик мувозанат йўлида муҳим силжиш кузатилади. Яқин йилларда даромади ўртадан юқори мамлакатлар қаторига кириш асосий мақсад экани уқтирилди. Халқимиз, депутатлар, давлат идоралари масъуллари, фуқаролик жамияти институтлари эзгулик йўлида ҳамжиҳат, тараққиёт йўлида талабчан бўлиб ҳаракат қилсак, албатта, бу маррага етамиз. Мурожаатноманинг бутун мазмун-моҳияти, йўналиш ва вазифалари Халқ демократик партиясининг ижтимоий барқарорлик, ҳамжиҳатлик ва бирдамлик, ҳуқуқлар ва имкониятлар тенглиги, химоя ва қўллаб-қувватлаш ғояларига ҳар томонлама ҳамоҳанг эканини ҳам таъкидлаш жоиз. Шунинг учун партияимиз фаоллари, депутатлик бирлашмалари билан Мурожаатномада белгиланган режаларни амалга оширишга доир ҳар бир дастур ва меъёрий ҳужжат, ҳар бир вазифанинг бажарилиши бўйича таъсирчан жамоатчилик ва депутатлик назоратини ўрнатамиз. Келгуси йил учун Ҳаракат дастурларимиз, ижтимоий-сиёсий режаларимизда бу масалани кун тартибидан туширмаймиз. Барча соҳадаги натижаларимиз 38 миллиондан зиёд катта халқимизга мос бўлиши учун муносиб ҳиссамизни кўшамиз.

БАРҚАРОР РИВОЖЛАНИШ ЙЎЛИДА МУҲИМ СИЁСИЙ ҲУЖЖАТ



Муқаддас ЎРАЗАЛИЕВА,
Олий Мажлис Қонунчилик
палатаси депутати,
ЎзХДП фракцияси аъзоси.

Ўзбекистон Республикаси Президенти томонидан Олий Мажлис ва халқимизга йўлланган навбатдаги Мурожаатнома мамлакатимиз тараққиётининг янги босқичини белгилаб берувчи, халқ манфаатлари, ижтимоий адолат ва барқарор ривожланиш тамойилларига таянадиган муҳим сиёсий ҳужжат сифатида тарихга киради. Унда илгари сурилган ғоя ва ташаббуслар Янги Ўзбекистонни барпо этиш йўлида қатъиятли қадамлар изчил давом этаётганини яққол намоён этади. Ўзбекистон Халқ демократик партияси Мурожаатномада инсон қадрини улуғлаш, аҳолининг ижтимоий ҳимояга муҳтож қатламларини қўллаб-қувватлаш, камбағалликни қисқартириш, аҳоли бандлигини таъминлаш, соғлиқни сақлаш ва таълим тизимини ислоҳ қилишга қаратилган устувор вазифаларни алоҳида мамнуният билан қабул қилади. Ушбу масалалар партияимиз сайловолди дастурининг асосий йўналишлари билан тўла уйғун экани алоҳида эътиборга лойиқ. Шунингдек, Мурожаатномада ижтимоий давлат тамойилларини янада мустаҳкамлаш, бюджет маблағларининг, аввало, халқ эҳтиёжларига йўналтирилиши, пенсия, нафақа ва ижтимоий тўловларни ошириш, ногиронлиги бўлган шахслар, кексалар ва ёшлар манфаатларини ҳимоя қилишга қаратилган аниқ вазифалар белгилаб берилди. Бу эса ХДП учун энг муҳим сиёсий устуворликлардан бири бўлган ижтимоий адолатни қарор топтириш йўлида мустаҳкам пойдевор бўлади, десак муболаға бўлмайди.

Хусусан, давлат бошқарувида очиклик ва жавобгарликни ошириш, қонун устуворлигини таъминлаш, маҳаллий ҳокимият органларининг аҳоли олдидаги масъулиятини кучайтириш масалаларига алоҳида эътибор қаратилди. Айниқса, иқтисодий ислохотларни ижтимоий йўналтирилган тарзда олиб бориш, кичик бизнес ва меҳнаткаш аҳолини қўллаб-қувватлаш, иш ҳақи ва меҳнат шароитларини яхшилаш бўйича билдирилган ташаббуслар партияимиз электорати – ишчи-хизматчилар, бюджет соҳаси вакиллари манфаатларига тўлиқ мос келади. Энг диққатга сазовор жиҳати шундан иборатки, Мурожаатномада белгиланган устувор йўналишлар ҳар бир соҳада ислохотларнинг аниқ манзили ва ижтимоий мақсадини белгилаб берди. Айниқса, иқтисодий ўсишнинг самараси, аввало, халқ турмуш даражасига таъсир қилиши керак, деган ғоя бутун ҳужжатнинг бош ғояси сифатида намоён бўлди. Бу эса Ўзбекистон Халқ демократик партиясининг “иқтисодиёт – инсон учун” деган тамойили билан тўла мосдир. Шуни ҳам эътироф этиш керакки, аҳолини ижтимоий ҳимоя қилиш соҳасида камбағалликни қисқартириш, манзилли ёрдамни кучайтириш, ижтимоий хизматлар тизимини ислоҳ қилиш борасида билдирилган таклифлар Ўзбекистон Халқ демократик партиясининг асосий ғоявий устуни бўлган ижтимоий адолат тамойилини мустаҳкамлайди. Айниқса, ногиронлиги бўлган шахслар, ёлғиз кексалар, аёллар ва ёшлар манфаатларини ҳимоя қилишга қаратилган ёндашув партия дастурида белгиланган устувор вазифалар билан бир йўналишда ҳаракат қиладиганини кўрсатади. Хулоса ўрнида таъкидлаш жоизки, Ўзбекистон Республикаси Президентининг Мурожаатномаси – бу фақат келгуси йиллар режаси эмас, балки ижтимоий йўналтирилган давлатни барпо этишга қаратилган мустаҳкам сиёсий платформа ҳисобланади. Ўзбекистон Халқ демократик партияси мазкур Мурожаатномани қўллаб-қувватлаган ҳолда, парламент ва жойлардаги вакиллик органларида ўз электорати манфаатларини ҳимоя қилиш, қабул қилинаётган қонунлар ва қарорларнинг халқ ҳаётидаги ижобий самарасини таъминлаш йўлида бор куч ва имкониятларини сафарбар этади.

ЯНГИ ЎЗБЕКИСТОН ТАРАҚҚИЁТИДА ЯНГИ ДАВР



Дилбар МАМАЖОНОВА,
Олий Мажлис Қонунчилик
палатаси депутати,
ЎзХДП фракцияси аъзоси.

Тараққий этган ақсар мамлакатларда давлат етакчисининг миллий парламент аъзолари ҳузурида энг асосий, долзарб ижтимоий-иқтисодий ва сиёсий-ҳуқуқий масалалар ҳамда жамиятнинг демократик ривожлантириш бўйича Мурожаатнома билан чиқши амалиёти мавжуд. Бу мазмундаги Мурожаатнома дастурий сиёсий-ҳуқуқий ҳужжатдир. Биринчидан, унда Президентнинг мамлакатни яқин истиқболда ривожлантиришга доир стратегик йўналишлар бўйича нуқтаи назари баён қилинади. Иккинчидан, сиёсий, иқтисодий, ғоявий-мафкуравий қоидалар билан бир қаторда, парламентнинг қонун ижодкорлиги фаолиятига тааллуқли аниқ таклифлар айтилади. Учунчидан, Президентнинг парламентга Мурожаатномаси жаҳон конституциявий амалиётида ҳокимият ваколатлари бўлиниши принципини таъминлашга қаратилган муҳим ҳуқуқий институт саналади. Ўзбекистон Республикаси Президенти Шавкат Мирзиёевнинг Олий Мажлис ва халқимизга Мурожаатномасида бу йилда барча соҳада амалга оширилган ишлар сарҳисоб қилиниши билан бирга, келгуси йилда амалга оширилиши кутиладиган устувор вазифалар белгилаб олинди. Мамлакатимизда ўтган тўққиз йилда рўёбга чиқарилган ислохотлар замирида инсон қадрини улуғлаш, халқ билан мулоқот қилиш мақсади турибди. Ушбу даврда, сўзсиз, юртимизда иқтисодиёт, энергетика, сув таъминоти, илм-фан, спорт ва аҳолини камбағалликдан чиқариш

йўналишларида катта ютуқларга эришилди. Давлат раҳбари томонидан 2026 йилнинг “Маҳаллани ривожлантириш ва жамиятни юксалтириш йили” деб эълон қилиниши Янги Ўзбекистон тараққиётида янги даврни бошлаб беради. Мурожаатномада белгилаб берилган устувор вазифалар маҳаллалар инфратузилмасини янада яхшилаш орқали юртимиз ободлигини таъминлаш, иқтисодиётни инновацион ва технологик равишга топтириш, ялпи ички маҳсулотни 2030 йилгача 240 млрд долларга етказиш, ички бозорда талабни рағбатлантириш, касбларни ривожлантириш ва янги меҳнат бозори архитектурасини яратиш, экологик мувозанатни таъминлаш, “яшил энергетика” ва сув ресурсларидан самарали фойдаланиш ҳамда замонавий давлат бошқаруви ва адолатли суд-ҳуқуқ тизимини яратишдан иборат. Мурожаатномада таъкидланганидек, маҳалла — жамиятнинг юзи. Агар маҳалла обод бўлса, бутун мамлакат обод бўлади. Маҳаллада ўзгариш бўлса, демак, бутун жамият ўзгаради. Шунингдек, сўнгги йилларда мамлакатимизда давлат бошқарувини таъминлаш ва суд-ҳуқуқ тизимида қатор ислохотлар амалга оширилди. Мурожаатномага кўра, 2026 йилдан «Электрон ҳукумат» платформаси тубдан янгиланади. Энди барча давлат идораларнинг мингдан зиёд давлат хизматлари, 5 мингдан ортиқ функция ва вазифалари, 240 та маълумот базаси ва ахборот тизими, 100 мингдан зиёд давлат хизматчисининг маҳалла, туман, вилоят, республика даражасидаги ваколатлари Ягона рақамли платформага интеграция қилинади. Шу билан бирга, суд-ҳуқуқ тизимини халққа яқинлаштиришга қаратилган изчил ислохотлар давом эттирилиб, одил судлов жараёнини “рақамли суд” концепцияси асосида ташкил этишга ургۇ берилмоқда. Энди тергов жараёнларини ҳам рақамлаштириш орқали инсон ҳуқуқлари ҳимояси кучайтирилади. 2026 йилдан тергов судьяларига санкция ва мажбурлов чораларини ўзгартириш ҳамда бекор қилиш ваколатлари ҳам берилади. Одил судловни таъминлашда жамоатчилик иштироки ва роли ошириб борилади. Мурожаатномада келтирилган устувор вазифалар пиروвардида юрт ободлиғи ва фаровонлигини таъминлаш, барча жабҳада инсон қадрини улуғлаш, жамият ҳаётида қонунийлик ва адолат тамойиллари устуворлигига хизмат қиладиган.

ФРАКЦИЯ МУҲОКАМАСИ

НАТИЖАЛАРИМИЗДАН ВАЗИФАЛАРИМИЗ КЎП

Йил охири. Ҳар йили календарь санаси январга яқинлашгани сайин нималар қилдигу қандай имкониятлар бой берилди, келгуси йилда қандай режалар тузаямиз, деган савол билан фаолиятимиз сарҳисоби ҳаёдан ўтаверади.

Йил якунида бўлиб ўтган Олий Мажлис Қонунчилик палатасидаги ХДП фракцияси йиғилишида ҳам эришилган ютуқлар, қўлга киритилган натижалар баҳоланди. Парламент минбарисидаги ташаббуслар, муҳокама қилинган қонун лойиҳалари, аҳоли манфаатларига қаратилган амалий ҳаракатлар, кейинги вазифалар муҳокама марказидан ўрин олди.

МУРОЖААТНОМА МАЗМУН-МОҲИЯТИНИ ХАЛҚИМИЗГА КЕНГ ТАРҒИБ ҚИЛИШ БЎЙИЧА ВАЗИФАЛАР БЕЛГИЛАНДИ

Парламент қўйи палатасидаги Ўзбекистон Халқ демократик партияси фракцияси мажлисида Ўзбекистон Республикаси Президентининг Олий Мажлисга ва халқимизга Мурожаатномасида фаровонлиқни кўзлаб илгари сүрилган ташаббуслар мазмун-моҳиятини аҳолининг кенг қатламларига, сайловчиларга етказиш, юртимиз равнақиға хизмат қиладиган вазифаларни амалга ошириш жараёнларида фаол иштирок этиш, бу борада муҳим чора-тадбирларни белгилаб олиш масалалари атрофлича муҳокама қилинди.

Фракция раҳбари Улуғбек Иноятов Мурожаатномада сўнгги тўққиз йилда эришилган ютуқ ва натижалар аниқ рақамлар асосида таҳлил қилингани, давлат ва жамият олдида турган долзарб вазифалар кўрсатиб ўтилгани, эзгу ниятлар билан юксак марралар белгилаб берилганини таъкидлади. Мурожаатноманинг энг асосий жиҳатларидан яна бири шунда бўлдики, унда илгари сүрилган тақлиф-ташаббуслар, билдирилган фикрлар кўп миллатли халқимизнинг ижтимоий қайфиятини кўтарди. Ишонччи янада мустаҳкамлади.

Қайд этилганидек, давлат раҳбари алоҳида ургу берган, “биз ислохотларни аниқ амалий натижаға айлантиришни ўргандик”, деган фикр замирида чуқур маъно муҳассас.

Депутатлар иқтисодиётда эришилган натижалар ижтимоий ҳаётда бевосита акс этаётганини, миллионлаб оилалардаги муҳит тубдан ўзгараётганини билдирди. Жорий йилда 5 миллион аҳоли даромадли бўлиб, ишсизлик даражаси 5,5 фоиздан 4,9 фоизга тушди. Қарийб 1,5 миллион эҳтиёжманд аҳоли камбағалликдан чиқди.

“Маҳаллани ривожлантириш ва жамиятни юксалтириш йили”да иқтисодиётни янада ривожлантириш, ижтимоий ҳимояни кучайтириш, иш ўринлари яратиш ва бандлик даражасини ошириш бўйича белгиланган вазифалар ижросида фракциянинг фаол иштирокини таъминлаш масаласида фикр-мулоҳаза ва тақлифлар берилди.

Хусусан, фракция аъзоси Шарофиддин Назаров ижтимоий-иқтисодий вазифаларнинг сифатли бажарилиши бўйича ҳукуматга, вазирлик-идораларга фракция позициясини доимий билдириб бориш, вакиллик ҳокимиятига берилган ваколатларнинг натижадорлигини ошириш зарурлигини қайд этди.

Фракция аъзоси Улуғбек Шерматов Ўзбекистон ташқи сиёсатда жуда фаол эканини таъкидлаб, халққаро келишувларда зимманизга олинган вазифаларнинг бажарилиши юзасидан парламент ва депутатлик назоратини изчил йўлга қўйиш кераклигини билдирди.

Фракциянинг яна бир аъзоси Қизилгул Қосимова соғлиқни сақлашнинг қўйи тизимида, айниқса, оилавий поликлиникаларда хизмат кўрсатиш сифатини ошириш масаласи округлардаги фаолиятнинг асосий йўналишларидан бири бўлиши кераклигини таъкидлади.



**Иба НАРИЗОВА,
Олий Мажлис Қонунчилик палатасидаги
ЎзХДП фракцияси аъзоси:**

- Ижтимоий ислохотларнинг асосий мақсади — инсонлар ҳаётини яхшилаш, уларнинг даромад манбаларини кенгайтиришдир. Шу нуқтаи назардан сўнгги йилларда бу борада эришилаётган натижалар эътиборга лойиқ.

Шунингдек, кредит, субсидия, компенсация каби 100 дан зиёд хизматлар орқали ижтимоий ҳимоянинг мутлақо янги тизими йўлга қўйилиши натижасида 8,5 миллиондан зиёд одам камбағалликдан чиқарилган. Яъни, юртимизда камбағаллик даражаси йил бошидаги 8,9 фоиздан 5,8 фоизга тушган. Бунда ишсизлик даражаси ҳам 2 қарра қисқарган.

Президентимиз Мурожаатномада истеъдодли ўғил-қизларимизнинг таълим, илм-фан, маданият, санъат, спорт ва бошқа соҳаларда эришаётган катта ютуқларига тўхталиб ўтди. Жумладан, ўқувчи ва талабаларимиз жорий йилда халқаро фан олимпиадаларида 51 та олтин, 101 та кумуш, 126 та бронза медалини қўлга киритиб, ўз билим ва салоҳиятини бутун дунёға намойиш қилиш орқали Янги Ўзбекистон равнақиға муносиб ҳисса қўшаётгани таъкидланди.

Мурожаатномада бу борадаги саъй-ҳаракатлар янада изчил давом этишини аңгладик. Шунингдек, иқтисодиёт, ижтимоий соҳа, таълим, соғлиқни сақлаш, рақамлаштириш ва хавфсизлик масалаларида қандай ўзгаришлар бўлиши айтиб ўтилди. Бундан жуда хурсанд бўлдик. Худудлар, маҳаллалардаги учрашувларда шу мавзуда кўпроқ гаплашишимиз, фикр алмашишимиз зарур, деб ўйлайман. Ҳар бир йўналиш бўйича кўзланаётган марралар ва уларга эришишнинг аниқ механизмлари кўрсатиб ўтилди.

Умуман олганда, Мурожаатнома ҳар бир соҳада аниқ мақсад ва механизмларни белгилаб, давлат ислохотларининг самарали ва натижадор бўлишиға йўл очмоқда.

2026 йилнинг юртимизда “Маҳаллани ривожлантириш ва жамиятни юксалтириш йили” деб номланиши ва бу борада белгиланган чора-тадбирлар ҳар биримиздаги дахлдорлик ва масъулиятни бир неча баробар оширади.

Бу йилнинг асосий мақсади маҳалла ва жамиятнинг барқарор ривожини, аҳолининг

ҳаётий даражасини кўтариш ва ижтимоий соҳада сифатли ўзгаришлар яратишдан иборат.

Маҳалла – ҳар бир инсоннинг ҳаётида муҳим ўрин тутувчи, барқарор ижтимоий муҳитни таъминлайдиган асосий институционал тузилма. 2026 йилда маҳаллаларни ривожлантириш орқали аҳоли учун қулай шарт-шароитлар яратиш, муаммоларга самарали ечим топиш ва жамиятдаги барча қатламларнинг фаол

жойларда фуқароларни қийнаётган тизимли муаммоларни таҳлил қилиш ҳамда ижро органлари фаолияти устидан парламент назоратини ўрнатиш бўйича бир қатор ишларни амалга оширди.

Жорий йилнинг 15 май куни Ўзбекистон ХДП фракцияси ўзини парламентдаги муҳолифат фракция сифатида эълон қилди. Ҳисобот даврида фракция парламентда муҳолифат сифатида партия электорати

лойиҳасини ишлаб чиқиш ва Қонунчилик палатасига киритишда ҳам ташаббускор бўлди. Қонунларнинг халқчиллиги ва аҳоли ҳаётиға ижобий таъсирини таъминлаш мақсадида лойиҳалар «марказ – вилоят – туман» тизимида партия қўйи бўғинлари ва маҳаллий Кенгашларда муҳокама қилинди, кенг жамоатчиликдан тақлифлар олинди.

Фракция ва партия ҳамкорлиғида 40 га яқин қонун лойиҳасининг жойлардаги муҳокамаси ташкил этилди. Ушбу муҳокамаларда 50 дан ортиқ аниқ тақлифлар киритилиб, қонунларни такомиллаштиришда фракция аъзолари томонидан фаоллик кўрсатилди.

Фракция аъзолари сайлов округларида 1 095 маротаба учрашувлар ўтказиб, 755 та хонадонға ташриф бўюрди. Уларда 39 620 нафар фуқаро, шу жумладан, 2 900 та тадбиркор билан тўғридан-тўғри мулоқотлар ташкил этилди. Шунингдек, мингдан ортиқ ижтимоий соҳа объектлари фаолияти билан танишилди, маҳалладаги муаммолар аниқланиб, уларни ҳал этиш чоралари кўрилди.

Ишчи гуруҳ Қорақалпоғистон Республикаси ва барча вилоятларда «Камбағалликдан фаровонлик сари» дастури доирасида кенг қўламли ўрганишлар олиб борди. Натижада ногиронлиги бўлган шахсларни қўллаб-қувватлаш, пенсия тайинлаш, таълим соҳасидаги муаммоларни ҳал этиш, аҳолини арзон уй-жой ва сифатли хизматлар билан таъминлаш, бандлик ва янги иш ўринлари яратиш, эзиқ-овқат ҳавфсизлиги ва инвестиция дастурларининг ижроси бўйича аниқ маълумотлар йиғилди ва тегишли идораларға тақдим этилди.

Фракция аъзолари номиға жами 463 та мурожаат келиб тушди, шундан 141 тасиға ижобий ечим топилди, қолганлари эса мутасадди ташкилотларға кўриб чиқиш учун юборилди.

2025 йилда амалға оширилган бу ишлар фракциянинг аҳоли манфаатларини ҳимоя қилиш, давлат сиёсати ва қонунчиликни ривожлантиришдаги масъулиятли ва фаол позициясини кўрсатади. Ҳар бир ташаббус, ҳар бир қонун лойиҳаси ва жойлардаги учрашувлар фракциянинг халқ билан яқинлиқда ишлаётганлигини ва ҳар бир инсон ҳаётида ижобий ўзгаришлар қилишға қаратилганлигини яққол намоён этмоқда.

2025 йил ХДП фракцияси учун самарали ва қизгин кечган давр сифатида ёдда қолди. Янги йилда эса янада масъулиятли вазифаларни бажариш, бир қатор ғоя ва ташаббусларни рўёбға чиқариш учун талабчанлик билан фаолият юритиш зарурлигини фракцияимизнинг барча аъзолари, албатта, яхши аңглайди.

**Лазиза ШЕРОВА,
“Ўзбекистон овози”
муҳбири.**

ХДП ФРАКЦИЯСИ 2025 ЙИЛДА ҚАНДАЙ ИШЛАДИ?

Йиғилишда, шунингдек, ХДП фракциясининг 2025 йилдаги фаолияти муҳокама қилинди. Йиғилишда ўтган йилда амалға оширилган қонунчилик ва ижтимоий соҳадаги ишлар, шунингдек, янги йилға мўлжалланган вазифалар атрофлича кўриб чиқилди.

Таъкидландики, якуниға етаётган ушбу йилда Ўзбекистон ХДП фракцияси сайловолди дастурида илгари сүрилган ғоя ва ташаббусларни амалға ошириш, ижтимоий соҳадаги норматив-ҳуқуқий ҳужжатларни такомиллаштириш, сайловчилар билан мулоқотни кучайтириш,

овозини етказиш, уларнинг манфаатларини самарали ҳимоя қилиш, мамлакатда ижтимоий сиёсатни ривожлантириш ва ҳукумат томонидан Қонунчилик палатасиға киритилаётган Давлат дастурлари ҳамда Бюджет ижросини таъминлашда фаоллик кўрсатди. Шунингдек, қонун лойиҳаларининг электорат манфаатларига тўғридан-тўғри хизмат қилишида конструктив позицияси билан фаол иштирок этди.

Бугунги кунға қадар фракциянинг қонун ижодкорлиғи режасиға киритилган 10 та қонун лойиҳасидан 1 таси ишлаб чиқилиб, Қонунчилик палатасиға тақдим этилди. Шунингдек, 7 та қонун лойиҳаси Вазирлар Маҳкамаси томонидан Қонунчилик палатасиға киритилиб, қабул қилинди. Иш режадан ташқари 1 та қонун лойиҳаси фракция ташаббуси билан Қонунчилик палатасида қабул қилинди.

**Фирдавс ШАРИПОВ,
Олий Мажлис Қонунчилик палатасидаги
ЎзХДП фракцияси раиси
ўринбосари:**

- 2025 йил биз учун қизгин ва самарали йил бўлди. Фракция аъзолари нафақат парламентда қонунчилик фаолиятида, балки жойларда аҳоли билан тўғридан-тўғри мулоқотда ҳам фаоллик кўрсатди. Бу йилда фракциянинг ташаббуслари, қонун лойиҳалари ва ижтимоий лойиҳалар орқали аҳоли манфаатини таъминлаш, давлат сиёсати ва қонунчиликни ривожлантиришда сезиларли натижаларға эришилди.

Масалан, фракция аъзолари бошқа фракциялар билан ҳамкорлиқда 8 та қонун

Эълон

КОРХОНА ВА ТАШКИЛОТЛАР РАҲБАРЛАРИГА!

Ўзбекистон Халқ демократик партияси Марказий Кенгаши қуйидагиларни харид қилиш учун танлов эълон қилади:

- 18 дона Моноблок 24 / FHD IPS / H610 / Intel Core i3-12100 / 8GB DDR5 / SSD 512 GB NVMe / микрофонли веб-камера / Wi-Fi 5 / Bluetooth / симсиз клавиатура ва сичқонча;
- 10 минг дона А6 ҳажмдаги блокнот;
- 10 минг дона ручка;
- 5 минг дона партиянинг эсдалик кўкрак нишони;
- 50 дона 1,20x2,20 ҳажмдаги катта байроқ

Тижорат тақлифлари 2026 йил 12 январь кунига қадар қуйидаги манзилда қабул қилинади:
100029, Тошкент шаҳри, Мустақиллик майдони, 5/3.

Изоҳ: танлов савдоларида қатнашиш истагини билдирган корхона ва ташкилотлар амалға ошириладиган хизматларнинг таснифлари ҳақида (71) 239-19-73 телефон рақами орқали маълумот олишлари мумкин.



Xalq banki jamoasi barchani kirib kelayotgan
2026-yil bilan tabriklaydi!

Yil davomida xonadoningizni tinchlik, fayz, baraka
va xursandchiliklar tark etmasin!

2026-yil Siz uchun moliyaviy farovonlik, yangi marralar
va muvaffaqiyatlar yili bo'lishini tilaymiz.

Yangi yil muborak bo'lsin!



 **xazna**



ilovani
yuklab
olish
uchun
QR-kodni
skanerlang

MUASSIS:



O'zbekiston O'vozi

TAHRIR HAY'ATI:

Ulug'bek INOYATOV
Ulug'bek VAFOYEV
Maqsuda VORISOVA
Qalandar ABDURAHMONOV

Guliston ANNAQILICHEVA
Muslihiddin MUHIDDINOV
Olim RAVSHANOV
Toshtemir XUDOYQULOV

Bosh muharrir: Nazira MATYAKUBOVA

MANZILIMIZ: 100029, Toshkent, Mустақиллик майдони 5/3

Телефонлар: (71) 239-12-14

Реклама бўлими: (91) 190-19-49. E-mail: uzbovozi@mail.ru

«Sharq» nashriyot-matbaa aksiyadorlik kompaniyasi
bosmaxonasida chop etildi.
Korxona manzili: Buyuk Turon ko'chasi, 41-uy.
Gazeta ofset usulida, A-2 formatida bosildi. Hajmi — 4 bosma taboq.

Gazeta O'zbekiston Matbuot va axborot agentligida
0006-raqam bilan 2007-yil 11-yanvarda ro'yxatga olingan.

Navbatchi: **Ravshan SHODIYEV**

Г — 1237. 1573 nusxada bosildi.

Nashr ko'rsatkichi — 220.

t — Tijorat materiallari

O'zA yakuni —
Topshirilgan vaqti — 17:00

1 2 3 4 5 6

Sotuvda kelishilgan narxda

Gazeta haftaning chorshanba kuni chiqadi. «O'zbekiston ovozi» materiallarini ko'chirib bosish faqat tahririyat ruxsati bilan amalga oshiriladi.